


UDI WITABUUJA ACI ANYI?

 Nenku kumpala kwa twètù kusambila, ndi njinga kwamba nenku ne, diloolo dishaale edi, ngeela meeji ne divwa ndyôdi, mwawa mwambile inâbânzà kampanda ne: “Bu wêwè anu mwa kwenzaku mutudi balongeshiibwe mwa kwenza, ne ciikàle. . .mwânà wa mu diboko wa mutu mudyundakanangane awu, mmufwanyine kukeepela.” Ke mutu wa mwânà awu e kukeepelawu, makeelela diloolo awu, cyabibidi cimwe cya cyâlâ [cm 1,27] ku cipiminu cya kanshinga. Pa nanku inâbânzà awu mmulwe nende mwaba ewu patudi twakulangana apa.

² Mpindyewu, cîmvwà mwenzele ciine aci, mwaneetu wa bakaji, mbwa kiipacila kampanda. Wamonu anyi? Wêwè mwa kumona cintu kampanda cya dilenga ne byanza cyenzeke, aci necidyundishe diitabuuja dyebe bwa kutungunuka ne kuciitabuuja. Misangu mikwabo ntu ngenza aci anu bwa, pâmwâpa, bu müdi kulomba muntu bwa kujuuka kuulu, kwela cidya cimwe anyi bibidi, kunyungisha cyanza, kunyungisha munu, anu cintu kampanda cidye mwa kwenza cya cishiilangane, anu bwa kubalekela bwa bamone ne byônsò abi mbya cya bushuwa. Bôbò badi anu babinduluka ne beela meeji ne kabyakwenza to, kadi’s nyewu byenzeka dîba dyônsò edi. Nwamonu anyi? Bidi ne cya kwenzeka.

³ Mbanganyi badi baswe bwa babavuluke mu disambila, mpindyewu? Nudiku mwa kwela byanza byenu muulu ne kwamba ne: “Mukalenge, enzaku nanku” anyi? Twinyikaayi mitu yetu.

⁴ Mukalenge, bu mutudi tuumvwa musambu ewu wa cikuma wa kale wa ekeleeziya, mufunda kudi mulunda wanyi wa mushinga mukole, Paul Rader ne: “Itabuuja naka,” tudi tuvuluka mpindyewu nsongaalume kampanda, wâkatwâdilabò bayiidi kudi baatatwëndè, kakuyi kwanji kupita matuku dikumi paanyima pa Yesu mubape bukole bwa kwipata badémons ne kwondopa babeedi, kadi ke bôbò aba bacimunyiibwe anu menemene pa disaama dya ciseki. Ke kumonabo Mukalenge wetu wenda ulwa. Ke tatwëndè kulwaye lubilu e kwamba ne: “Mukalenge ikalaku neetu luse. Mwanaanyi wa balume mmuyoobesha bibi be kudi démon. Ndi mulwe nende kudi bayiidi Beebe kadi bôbò kabayi mwa kumwondopa to.”

⁵ Yesu kwambaye ne: “Mémè ndi mwa kumwondopa, bu nwênù mwa kwitabuuja. Itabuuja naka.” Êyi Nzambi, Wêwè kutu mushintulukeku nansha kakese to kacya ku mwine musangu awu: Udi anu Nzambi umwèumwè wa dinanga, wa kalolo, ne utu wabanyangana makenga ne bantu awu. Anu mŪvwà musangu awu, ke mŪdi leelu ewu. Nenku Mukalenge,

anu bu taatu awu, nyewu twela bônso lubila ne: “Mukalenge, Wêwê utukwacisheku mu bupidya bwetu.” Mbipeepele anu bya menemene ebi; tudi anu tutondokelapu’s, Taatu.

⁶ Tudi baswe kuKulambula masakidila ne butumbi bwa dilenga dya mwânà mukese wa mu diboko awu makeelela diloolo, pa kumona ne kabalubalu kaa mutu aku, kàvwà kûle, mbwena kwamba ne, mufuba nguvwa musomòke, mmupweke mu cyabibidi cimwe cya cyâlà makeelela diloolo. Tudi ne kusakidila bwa bwalu abu, Taatu. Patudi twêtù bamanye ne bangangabuka beetu kabeena ne bwa nsongo mu bukebikebi bwa cyôci aci to, kakwena cintu nansha cimwe cidibo mwa kwenza pa bwalu abu to; kadi Wêwê uciidi anu Nzambi, Mfumu wa byônso bìdi byènzekà. Tudi tuKwela twasakidila, Taatu. Tudi tuKwela twasakidila bwa lulamatu lwa maamu ewu, ne kalolo, ne butumike bwa kwalukila ne kanshinga aka ne kukalamika pa dìbeji edi, apa, bwa kuleeja bantu bônso bujaadiki bwende bwa butumbi bwa Nzambi. Swaku bwa mwanende mukese ewu ikale ne mwoyi ne ikale mwânà bu mudi bônso, bwa butumbi Bwebe.

⁷ Tangilaaku byanza byônso bidi byela muulu byabya, Taatu. Cyônso cya kudibi civwa ne dijinga. Cyanyi ncyeci cyela muulu, cyôci paaci, Taatu, ndi ne dijinga. Ke makwabo ngôwò aa bûngi cyanaana kaaba aka, mu mmwenekelu wa mikanda mifunda anyi mu kasheete aka, biikale mu lukengelu lwa bintu, bantu biikale mu lukengelu lwa bintu lwa menemene. Byenzekeku, Mukalenge, ne muntu ne muntu apeteku dilomba dyende diloolo edi. Swaku bwa bangate bujaadiki bwa maamu ewu anu bu cileeji lu cya kuleeja ne paudi Wêwê wamba cintu kampanda, nkujike. Cidi . . . Wêwê . . . Cyônso cidi cikengela bwa twêtù kwenza nkucyakidila ne kwenza maalulu bilondeshile cyôci aci. Mmudimu mujikija.

⁸ Enzaku, Mukalenge, ne umwe ne umwe wa ku mikanda mifunda eyi ne mishwala eyi, bantu baayitentekelabo abu, bondopiibwe. Yônso wa ku badi beele byanza byabo muulu abu, Taatu, bapeteku dijinga dya mwoyi yabo. Tudi tulomba nunku, mu Dîna dya Yesu. Amen. Nudi mwa kusombelaayi panshi.

⁹ Mwva muswe anu kunuleeja kanshinga aka, kàdi ìnăbanzà ewu (Ke kôkò aku’s. Um-hum.) . . . ke mutu wa mwânà mukese wa mu diboko uvwa mukeepetele awu mùvwà Mukalenge mutulaye ku Nyuma Mwîmpè makeelela diloolo. Yêyè kî mmulenga mulaya anyi? Pa nanku, aci cidi citupaku bukito bwàbûngi bwa kwikala ne diitabuuya ne bwa kwitabuuya.

¹⁰ Mpindyewu, paakambila Yesu mucu awu, mu Maako 11.23 ne: “Muntu nansha umwe kàdikù cyebe cimuma to kubangila ku leelu,” Yêyè kavwaku mufwanyine kwikala mwele lubila to. Mona ne, bwa kwamba menemene, Yêyè uvwa mucyènzè anu bipeepele bya menemene ebi, mu mushindu wa ne bayiidi Bende . . . Ngeela meji ne umwe wa kudibo wakaMuumvwa.

Nenku civwa. . . Mwena ciseki awu, paakafiiikaci kumpala kwa Mukalenge Yesu, mwànà wa balume awu wakapaluka bya bibi be bitambe bya kacya kwònsò aku; misangu mikwabo, wakakuluka panshi byenze bu ne wakafwa, kadi wakajingulula ne ùvwa mutuutakeene ne Kampanda Uvwa ne diitabuuja ditambidile dya bapostolo abu kule ne kule.

¹¹ Mpindyewu, ndi muswe bwa ne muntu kampanda utu kayi mwitabuuje dyondopa dya kudi Nzambi atabaleele cyôci eci. Yesu uvwa mubape bukole bwa kwipata nyuma ayi, kadi bôbò bavwa bapangile. Bukole abu kî mbuvwa bupangile to, kadi bôbò mbavwa bapangile. Yesu kubambila ne:

“Bwa cinyi twêtù katuvwa mwa kumwipata?”

Yèyè kwamba ne: “Bwa bupidya bwenu.”

¹² Ekeleeziya ucidi anu ne bukole kampanda. Nzambi kacya katu muumushe bukole Bwende mu ekeleeziya to, kadi ekeleeziya ngudi kayi ne diitabuuja dikumbane bwa kukwata naabu mudimu to. Ke cyònsò aci. Cyôci ncipeepele anu cya menemene eci. Twêtù mbadi misangu mikwabo tuteeta bwa kucivwija cikondakane, kadi paudi utamba kuvwija Evanjeeliyo mupepele, neutambe kupeta bulelela bupite, paudi anu ulwa mupwekele menemene naaci: Nzambi ngudi mwambe nanku; aci's ncikose bwalu; ne nkujike. Nenku ùcitàbùùjè anu cyanaana, uye kumpala.

¹³ Paakamba Yesu ne: “Muntu nansha umwe kàdikù cimuma cyebe to,” mona's, mabeji avwa anu malenga ne abalakana anu mwawu ne kale. Cizubu civwa cimweka anu cimwecimwe aci, kadi mwinshi mwa buloba mu miji amu, mwoyi wakabanga kwenda kuuminyina.

¹⁴ Ke mudibi kabidi nanku pa kansere, pa disaama kana dyònsò dyûdì—dyûdì mufwanyine kwelela meeji adi. Paudi mwa kwitaba Dìyì dya Nzambi, mwinshi mule mu miji mwamwa, kansere kadi anu mwa kwikalaku; cyanza cyebe ncifwanyine kwikala anu cyuminyine. Aci kaciyena ne cintu nansha cimwe cya dyenza ne dyondopa dya kudi Nzambi to. Cidi ne: “Bu wèwè anu mwa kwitabuuja.” Nwamonu anyi? Lwà mwinshi menemene mu mwaba kampanda mwamwa, cikaadi cimane kubanga kukwata mudimu.

¹⁵ Yesu wakamba ne: “Wèwè mwambile mukuna ewu ne, ‘Tentemuka,’ ne kuyi wela mpatà mu mwoyi webe to, kadi witabuuja ne cyûdì mwambe aci necyenzeke, udi mwa kupeta cyûdì mwambe aci.” Aci kî ncilenga anyi? Aci ncifwanyine kufumina kudi nganyi? Kudi Mwànà wa Nzambi, Mwena Mèyì. . . Maulu ne buloba nebijimine, kadi mpindyewu. . . kadi Ende Mèyì kaàkujìmina to.

¹⁶ Mpindyewu, mushindu umwepele wûdi mwa kwenza cyôci aci, bikengela wikale ne kiipacila kajaalame ne kabingila kajaalame. Mpindyewu, bu mèmè mwa kupatuka pambelu

apa ne kwamba ne: “Nènnùleejè ne ndi mwa kutentemuna mukuna ewu: “Tentemuka, wèwè mukuna.”” Kì mmufwanyineku kutentemuka to. Nansha kakese. Nansha cìndì naaci ciikale cinyi. Bikengela ciikale. . .Bikengela dyambedi wǎnjì kupeta diswa dya Nzambi.

¹⁷ Ke bwa cinyi, pa ciibidilu mu milongo ya babeedi, ntu—ntu mpeta mabeedi atu matambe bukole, bwalu ncintu kampanda cikaadi cicipilepicile mu milongo ne bikwabo, nenku ke mùdì ucipetulula amu. Kadi nwamonu’s, wèwè ne mpekaatu kayi mutonda to. . .Nukaadiku bamone mu disaama kampanda, kumpala kwa mèmè kwambila nyuma mubi bwa kuumukaye anyi? Ntu nkenketa disaama adi mu bulelela menemene bwa kwikala mutwishibwe ne kakwena kantu nansha kamwe mu nsòmbelu awu kadi kafwanyine kupangisha cintu kampanda, nwamonu’s, bwalu vulukaayi ne, mu mapà aa, udi mufwanyine kupeta naawu lutatu.

¹⁸ Nzambi, nudi nuvuluka ne musangu kampanda, wakapa muprofeta kampanda. . .wakavwija muntu kampanda muprofeta, Mòsa, ne wakamwambila bwa kupweka, kwakula ne lubwebwe. Kadi muprofeta awu uvwa musaluke bikole, e kupatukaye, e kutuuta lubwebwe alu, wakula bwa butekete bwa Kilisto, ne bivwa bikengela bwa Yèyè kufwa musangu mwibìdì anyi kutuuciibwa musangu mwibìdì. Ûvwa ne bukole bwa kucitwala, kadi kacivwa diswa dya Nzambi to.

¹⁹ Ncivwaku mwa kwitabuuja ne civwa diswa dya Nzambi bwa Eliya kunyungulukaye, anu bwalu bǎnà abu bavwa bamuyobola bwa muvwaye ne mutu dibàlà to, ncyèna mèmè ngeela meeji ne bivwa bikengela kwikalaye mwenze aci to. Kadi yèyè uvwa muprofeta, ne bavwa bamufiikishe munda, ke kwelaye bǎnà abu mulawu ne ours mikaji ibidi kushipayi bǎnà bakese makumi anaayi ne babidi bǎvǎ kabayi benze bwalu to. Nwamonu anyi? Kadi ncyèna mèmè ngeela meeji ne bivwa bikengela kwikalaye mwenze aci to. Nenku cidi anu—anu. . . twètù. . .

²⁰ Nzambi, ndi ngeela meeji leelu ewu ne, kumpala kwa kuteekaYe ekeleeziya Wende mu bukole, Ûdi ùteeta ekeleeziya Wende mwine awu bwa kumona cyenzaye.

²¹ Twètù. . .musangu kumpala, pǎmwǎpa, bu Mukalenge mwa kwanyisha pangiikala mwalukile, netupete cikondo cya kwalabala pa cintu bu nanku, pa cintu kampanda cidi pabwipi ne kwenzeka, nenku pa dǐbà adi netumanye byǎbǔngì pa bwalu bwaci.

²² Kadi wèwè mwa kwamba anu mwaku, ne: “Mukalenge, ndi nciitabuuja,” kuyi wela mpatà to, ucyambilamu munda mwa mwoyi webe. . .

²³ Mpindyewu, twǎmbè cileeji lu ne, mvwa nsanganyiibwa mu cibandabanda, ne nciyi. . .mwikale nyiisha mùliyò wa bantu, kadi luseke lukwabo lwa mukuna lwalwa, kwikale kasumbu

kaa bantu lukama, biikale bafwa kabayi bamanye Kilisto to. Ee, mêmè mwikale ne mùllyò mujima wa kuyiisha kaaba aka, kadi nansha nanku, Cintu kampanda munda mwa mwoyi wanyi cingambila ne: “Nda luseke lukwabo kudi bantu baba. Fika kudibo aku. Badi munkaci mwa kufwa.” Mêmè mwine nciyi muswe kuya to, kadi nansha nanku kwikale Cintu kampanda munda mwanyi emu. Nwamonu’s, aci n’Nzambi pa dîba adi, ukwata mudimu. Tangila umone cidi kiipacila, ne umone ne cidi kabingila kaa diya ne kadi cinyi, kakayi bwa didiyiila to. . . Mpindyewu, mêmè mwambe ne: “Ee. . .” Piikalabi ne kiipacila kaanyi kaa kukuya nkajaalame, kadi pa dîbà adi mfika apa kadi ke mukuna munene ngwôwò ewu apa, ngamba ne: “Udi mumanye, mêmè muye luseke lukwabo lwa mukuna lwalwa ne musungile bantu lukama bônso baba, dîngà dituku nebênzè lupingu kampanda kuntu aku ne: Mwaneetu Branham, missionnaire munene.” Mpindyewu, kabingila kaanyi aku kî nkajaalame to. Mukuna awu kawakuupukaku to. To, mukalenge.

²⁴ Kadi padi kabingila kaanyi ne kiipacila kaanyi twikale tujaalame, ne Nzambi mu mwoyi wanyi mwikale undombola, ne mêmè nciyi mwa kupicila pampala paa mukuna, anyi ku luseke lwa mukuna, anyi mwinshi mwa mukuna to, nêngâmbè ne: “Wêwè mukuna, tentemuka.” Pâmwâpa cidi. . . Pândi ngamba aci, anu ncyamba mushindu awu ne nyuma mujaalame, mulombola kudi Nyuma Mwîmpè, mu diswa dya Nzambi, mbifwanyine kwenzeka ne anu kankutu kakese cyanaana kaa mukuna awu kamata panshi, kadi cyôci aci cidi mu njila cyenda cilwa. Dituku didi dilonda pâmwâpa kudi mwa kumata livres ibidi [900 g]. Dituku didi dilonda cyabinaayi cimwe cya tonne [kilô 250]. Ne pâmwâpa mu ngondo umwe, tonnes itaanu [kilô 5.000] imata. Bidi byenza bwalu anyi? Nansha kuyi mwa kwanji kucimona to, kadi udi wenda utentemuka’s, mu njila wenda uya. Mêmè nênshaalè mwimane anu kaaba aku ntangila mudi cintu cyenzeka, bwalu Nzambi mmwambe nanku nenku aci ncikose bwalu.

²⁵ Udiku mwa kwela meeji awu bwa mamwêbè wawa diloolo edi anyi? Eyo, pawikala wela meeji awu, yêyè neasangale. Eyo. Aci mpawikala anu mucîtâbùùje: amba wêwè anu dîyi ne shaala naaci. Wamonu anyi? Ûcîtâbùùjè wêwè anu cyanaana; shaala mukwateku. M’Mwoyi wa Cyendelele.

²⁶ Mpindyewu, maalaba mu mapingaja. . . Ndi mwambile Billy, diloolo edi, anu bwa kulekela bwalu bwa twarta twa disambila, nenku mwawa muswe kwakula. Ndi njikula mu bulelela ne, ndi muye kacya ku ngondo wa kumpala, dyamwamwa dya mbû, ne mwalukile, mu Phoenix, anu kumbelu, ne mwalukile, kadi byônso nkòong (dijingulula adi) mu mushindu wa mêmè mucyoke bikole nciyi mwa kumanya ne ndi mwimane penyi to mingà misangu. Ncyambe ne kuncimuna.

27 Ne pashiishe, bikengela nguumuke, kadi bôbò...nwênù—nwênù bânà beetu nudi bambiikile bwa mêmè kushaala kabidi ndambu mukwabo wa matuku. Mushindu mwine wûndi ncyanyisha's we. Ncya bushuwa ne ndi ngeela meeji ne eci mmusumba mulenga wa bambi mwaba ewu. Mvwa mwa kujinga bwa twêtù kwikala bapeteku ndambu mukwabu wa dîbà bwa bwobumwe. Bu Mukalenge mwa kwanyisha, nêngàlukilè cikondo cidi kumpala. Kakuyi cikwabo cintu to, anu kuumuka ku ekeleeziya kuya ku mukwabo ne kunyunguluka mu cimenga ne kunukumbula nwênu bwônsò. Ndi mufwanyine kwikala ne disanka bwa kwenza cyôci aci: cintu kana cyônsò cîndi mufwanyine kwenza bwa kukwacisha Bukalenge bwa Nzambi, mbwena kwamba ne, bu nwênù mwa kuswa bwa mêmè kucyenza. Nenku bwa kwalukilaku cikondo kampanda ne kudisangisha neetu kadi kwenzaku disangisha dîmpè ditambe, dilenga dilaya mwaba kampanda.

28 Nenku nwavulukaayi, nwênù bânà beetu, nêngikalè nnusambidila. Ke cintu cimwe cya bushuwa ncyôci aci. Ne ndi muswe nunsambidile nwênù bwônsò, bwônsò bwenu.

29 Nenku mpindyewu ndi—ndi...maalaba mu dinda nekwikale masangisha a ekeleeziya mu ekeleeziya yônsò mishiileshiilangane eyi mu nyungulukilu wa cimenga cijima eci.

30 Mpindyewu, tumwe twa ku tusumbu twa ku Jeffersonville tudi mwaba ewu. Bamwe baa ku balunda baanyi, umwe wa ku balubuludi baanyi baa ekeleeziya, ùdi mwaba ewu, Mwaneetu Fred Sothmann. Ncituku kacya mupete mushindu wa kumumona mu disangisha to. Ne mwaneetu...Kaa, bakwabo bààbûngì baa ku balunda baanyi bàdì bafumine ku Jeffersonville kwaka, wanyi wa nkaaya...kaleeleki wanyi wawa ne—ne bônsò badi mwaba ewu, mwaba kampanda mu disangisha emu. Ncyêna mwanji kubamona to.

31 Nenku bânà beetu, kudi ekeleeziya milenga muneemu mu cimenga eci. Nenku nwênu bakwabo beenyi bônsò aba, petaayiku imwe ya ku yôyi ayi nuye mu ekeleeziya eyi maalaba. Neyinukwacishe, ndi mutwishiiibwe nanku. Bôbò abu mbânà beetu badi biitabuuje mudimu wa bwambi wa mushindu ewu. Ke cidi cyenza ne biikale basômbe kaaba aka ku cibumba cya ku cyambilu eku ne mu myaba eyi, mbwalu mbawîtâbùùje. Nenku mêmè ndi nganyisha bantu abu.

32 Mukalenge, beneshaku nshapita wa Beena-Kantu-ku-Byanza baa Evanjeeliyo mu Kaabujima ewu badi—badi batuule mfranga bwa disangisha edi aba. Kudi...Ngeela meeji ne bivwa bîmpè, badi batuule mfranga bwa disangisha. Ntu—ntu nya ne dikwacisha dya kudi bààbûngì baa ku batuudi baabo baa mfranga, bwalu mwômò amu...Kabivwa bikengela twêtù kwikala mushindu ewu nansha, kadi misangu mivule, bânà beetu batu bashiya tumwe tuntu tukese menemene tudi

tutapululangana: bu mudi muntu kampanda mwikale witabuuja *kantu kampanda* kaa kakese; mukwabo, *kantu kampanda* kakwabo kaa kakese; kiine aku kenza dikuuyakana ndambu ne mputa ya kale ya ifumina paanyima ntanta mule; Bivwa bikengela kwikalayi mimane kwondopiibwa pa dîbà edi, kadi cici—cidi. . . Kadi bu nwênù—bu mêmè mupete Beena-Kantu—ku-Byanza baa Evanjeeliyo mu Kaabujima, pa dîbà adi cidi cikiwacishaku mushindu kampanda bwa cyôci kuswikakana, ne bwa twêtù kudisanga pamwe, ne kupeta poopamwe bwobumwe bwa cya bushuwa, anu bikondo bya menemene bya dicyonkomoka. Nenku tudi twanyisha cyôci aci. Nzambi abenesheku nshapita awu. Mêmè ndi ngitabuuja ne Nzambi mmumujuule mu kiipacila kampanda.

³³ Mpindyewu. . . ne pashiishe ngâkapeta dîngà dituku dyêse dinenaanaale dya kubandilakù mwaba wa Mwaneetu Oral Roberts. Kadi ekelekele, mwaba munene webe wa kacya's, cintu cilenga cilaya. Nci—ncivulukilu bwa Mpenta.

³⁴ Pashiishe mêmè kuya kwa Mwaneetu Tommy Osborn, mwaba mukwabo mulenga be, muntu wa Nzambi mulenga, uvwa. . . Mwaneetu Tommy ne mêmè tutu anu bu mukaba ne cilâmbà, ne Mwaneetu Oral, yêyè pende, anu bânà beetu baa baswikakanangane menemene aba, ne tutu banangangane muntu ne mukwende, ne biikale tuteeta ne mwetu mwônsò bwa kwenza cyônsò citudi peetu mwa kwenza aci bwa dyakalenga dya cisamba mu Bukalenge bwa Nzambi.

³⁵ Pa nanku ndi nganyisha bushuwa mùdi bantu bônsò abu muneemu mu cimenga eci munkaci mwa bakwabo bantu baa maalu mîmpè banudi naabo aba. Nwênù mikooko nudi ne balami baa mikooko balenga be. Ndi anu, nêncyâmbè mêmè anu nanku awu. Disambila dyanyi ndya ne Mukalenge atungunuke anu ne kwikala neenu bônsò. Nenku mpindyewu maalaba mu mapingaja, ndi. . . Mpa dîbà kaayi padi disangisha adi dibanga's, bânà beetu? Pa dîbà ibidi ne tusunsa makumi asatu. Twâmbè ne mpa dîbà umwe—dîbà umwe anyi dîbà umwe ne tusunsa makumi asatu paakengelabi bwa nwênù kwikala nukaadi apa bwa kabàlu kwimanyika masangisha makwabo awu to.

³⁶ Mpindyewu, piikalabi ne bânà baa balume aba kî mbanji kunwambila to, diloolo edi badi ne mikanda, fòtò ne bikwabo, ne mikaba ya mēyi, ne mayiisha makwata pa mikaba, ne. . . bya masangisha, ne badi babisumbisha. Kadi katwakubalekela babisumbisha dya Nsabatu, maalaba to. Mikanda anyi cintu nansha cimwe kacyakusumbishiibwa maalaba nansha. Nanku katwaku. . . katûtukù banji kwanyisha aci to. Nansha mùdi bààbùngì bambe ne: “Wèwè udi mu ntupakanyi mibyâmbyalè. . .”

³⁷ Nenku Taatu mununu Bosworth uvwa ne ciibidilu cya kungambila ne: “Kaa, Mwaneetu Branham, bwa apu kaayi

udi mu ntupakanyi,” kadi mushindu awu ke wûndi mêmè ndyumvwa’s (Nwamonu anyi?), ne ke mûndi—mûndi ndyumvwa. Pawikala uwukeba, badi bakupeeshawu, kadi pawikala... Kadi katwena mwa kusumbisha dya—dya Nsabatu to. To. Ke cyônsò ncyôci aci. Piikalabi ne mêmè ndi ngitabuuja nanku awu, bikengela ncyënzè mu nsòmbelu wanyi, anu... Bikengela nsòmbelu wanyi akumbanangane ne bîndi mêmè mwine ngitabuuja. Nudi numona anyi? Nenku bidi bikengela mêmè—mêmè kushaala ne bîndi mutwishiibwe ne ke mudibi ne pa nanku... Anyi udi mwa kutuma mfranga kumbelu, nenku, ku lubanza kwaka, kumbelu kwaka bwa kubipeta.

³⁸ Mpindyewu diloolo edi, kaa, twêtù bônso twänjàayi anu kupwa aci mwoyi, kaa, cya ne kudi mudimu kampanda wa dylene, anyi nî ncinyi cikwabo, anyi midimu mikole ya dituku. Tuteekaayi anu bintu byônso ku luseke, ne tutangile mu Dìyi mu ndambu wa tusunsa, bwa kumona cidi Nzambi mufwanyine kutwambidila ku Dìyi Dyende. Nenku swayiku nsambile bwa Nzambi atupeku anu dibenesha kampanda dya ditambe bunene diloolo edi.

³⁹ Gene, udi mwa kumbakwilaku anyi? Udiku mwa kumbakwila kânà kaa bakaji katekete aku anyi? Kî nkaacintu kakese kalenga anyi? Udi wanyishaku bwa tuye neebe kwanyi kumbelu bwa ukanaye ne Sarah wanyi mutekete, wa bule *ebu* anyi? Kaa, udiku mufwanyine kwanyisha? Ndi—ndi muswe bwa wêwè kwanyisha nanku. Yêyè’s udi anu cipimu cyebe aci, ne yêyè nkânà kaa bakaji katekete kaa kanange Papa. Um—hum. Hum. Nenku ndi mutwishiibwe ne wêwè—wêwè peebe utu munange Papa webe, kî mmwômò anyi? Maman? Kaa, s’ncya bushuwa ne utu mumunange. Kânà kaa bakaji kakese kalenga kalaya, kândi mêmè mwaba ewu, anu kacya ngaatangila. Twîsù tukese twenze anu bu tusoso tubidi tutubula ne kadilu mu mbulankete ne—ne tusuki tukese tufiikuluke.

⁴⁰ Ntu mêmè anu munange bânà bakese. Ndi ne bânà baa bakaji bakese babidi kumbelu’s. Umwe wabo n’Rebekah ne mukwabo n’Sarah.

⁴¹ Mwaba ewu kukaadi cikondo kampanda, mvwa muumuke. Bubidi bwabo mbânà baa bakaji bakese baa banange Papa, nudi bamanye’s, ne mêmè ntu mubanange. Nenku padibo anu babwela bikengela mbënzè cingulubengulube cyàbànda mukuna, ne... anu Becky ke ukaadi utamba kwikala munene be bwa cyôci aci; ukaadi bunene anu bu bwanyi ebu. Mmufwanyine kuncibula nyima bwa mpindyewu; yêyè udi... kadi uci anu mwânà wa bakaji mukese wa munange Papa’s, nansha bishi. Nenku mpindyewu, pa kwamba cidimu cikwabo kumpala eku, tudi baswe kumubweja mu cilongelu cya Bible cya mwaba kampanda bwa kuumusha mu tulaasa twa mbulamatadi.

42 Nenku pa dîbà adi, bavwa anu kacya baashaala kabayi balaala to bindile Papa, nudi bamanye's, bwa alukile kumbelu. Mvwa mupatuke muye mu masangisha. Nenku maalaba diloolo nebiikale anu bashaale bindile too ne mundankulu bwa mêmè kwalukila. Ke pa dîbà adi, mêmè kwalukila pacyacya menemene, twipacila pa dîbà isatu anyi inaayi. Ke mamwâbò kulwaye kungunzulwila ciibi ne mêmè kubwela, kadi mvwa mucyoke be ne muzengele mu mushindu wa ne, mvwa . . . Apa pa cibumba cya ku cyambilu, mvwa . . . pavwa . . . dilaabiibwa diikale dyumvwika bilenga bya kacya, kadi padidi anu dikuumuka, ke paudi upetela lutatu mpôpò apu's. Mbanganyi bakaadiku bamanye aci? Mona's, ncyà bushuwa ne ke mudibi.

43 Tangilaayi. Eliya wakabanda kuulu kwa mukuna ne wakabiikila kapyà mu dyulu, wakabiikila mvula mu dyulu, kadi pashiishe paakamushiya Nyuma, wakalalakana mu cipeela munda mwa matuku makumi anaayi ke Nzambi kumusanganaye, mudikokele mu nyongolo mwaba kampanda.

44 Yona, yêyè wakapweka e kushaalaye ne mwoyi mu difu dya mushipa wa balena munda mwa matuku asatu a muunya ne a bufuku, kumulükilawù ku mwelelu wa mâyi ne kuyaye wenda uyiisha. Cimenga cyònsò nkòong cyakanyingalala ne cyakaalukila kudi Nzambi. Kadi dilaabiibwa ndyenze anu dimuumuka, kubandaye kuulu kwa kakuna e kulombaye Nzambi bwa angate mwoyi wende. Nwamonu anyi?

45 Mvwa mwimane ku luseke lwa majambu a William Cowper, abidi adi panshi aa, yêyè mene wâkafûnda musambu mwende luumu utûtù twimba dîbà dya meesa etu a Mukalenge awu ne:

Kudi mpokolo mùle ne Mashi,
Makoka mu mijilu ya Emanuwele,
Mudi bangènzàmpèkààtù bôbò badînè
mwinshi mwa nkwaka . . .

46 Nukaadiku bumvwe cituye . . . cyakamwenzekela anyi? Paanyima paa disonsodiibwa adi dimane kuumuka pa cyôci aci, wakateeta bwa kupeta musulu bwa kudishipaye.

47 Ndi musòmbèle anu bitangilangane ne Old Kentucky Home. Nenku Stephen Foster ke wâkapetsha Amerike misambu yende ya bwena mwabo ya mitambe kwenda luumu ayi. Nenku pavwaye mwa kufunda, uvwa upeta disonsodiibwa, disonsodiibwa adi, ufunda musambu kampanda, pashiishe pavwaye upatukamu, ùvwa mwa kuya kakwacika maala. Ndekeelu wa byònsò, kubiikilaye musadidi kadi kwangata kapaaya e kudishipa.

48 Bantu kabatu bamanye ne ncinyi citù bantu badi mu bipaapu bya nyuma abu bapicila to. Mpindyewu *apa*, udi udyumvwa anu bu mufwanyine kutentemuna mukuna. Kadi lekela anu dilaabiibwa adi dikuumuke, kadi ubange anu mwa kupatukila ku ciibi cyacya (kwôkò kakuyi muntu mwaba awu

bwa kukukwata to, wamonu's) nenku dîbà adi, pàmwápà munda mwa mēbà makese cyanaana, udi ubanga kudikonka ne udi penyi. Nenku dîbà adi diloolo ne diloolo dyônsò, aci cidid cikuzengeja's.

⁴⁹ Nenku kakese... Ndi muswe kunulondela bwa bânà batekete aba Sarah ne Rebekah. Nanku paakacyabu mu dinda, ncivwaku mwa kulaala to, nenku nkaavwa mujuuke, musombèle mu nkwas, ke paanyima pa katanci Becky, bu mudiye mukulumpe, yêyè uvwa—uvwa ne mikolo mile mipite ya Sarah, ke Becky kulwaye lubilu... mubiike, mutuuluke ku bulaalu, kayi ubiishaku mwakunyende wa bakaji awu to, kadi ke yêyè udi ulwila mu nzubu ewu, unyeema ne mwende mwônsò. Wenda wamba ne: "Papa, Papa..." Mémè kwolola umwe wa ku mikolo yanyi, ke kutupikaye e kucyamakanapu, udikupulula anu byetu bya menemene ebi. Byenze anu mùdì eke—ekeleziya wa cyena leelu ewu, nudi bamanye's, udi mu dinaya kukaadi ntanta mule, nudi bamanye's, kukaadi nkama ya bidimu ndambu. Yêyè uvwa mwa kudikupulula anu bîmpè be, e kunjingila maboko kunshingu kadi wamba ne: "Kaa, Papa wanyi, Papa wanyi..."

⁵⁰ Kadi Sarah mutekete, mu dilubakana amu, ukaavwa mubiike. Ee, ncyêna mumanye ne beenu bânà batu paabo bacyenza anyi kabatu bacyenza; baanyi mémè batu bacyenza: Wa mushaadile awu wangata bilambà bya udi mubândile. Nenku Sarah uvwa muvwale pijâmâ wa Becky, mumupite bule ku makàsà, nudi bamanye's. Kadi ke yêyè ulwalwa ewu, kakwacikwetu katekete kîpi, kenda kadishinda, katetuka. Ke kufiikaye kaaba aku, pashiishe ndambu. Ke Becky kukudimukaye, kwamba ne: "Sarah, mwakunyaanyi wa bakaji, ndi muswe nkwambile cintu kampanda." Yêyè ne: "Mémè ke ukaavwa wa kumpala mwaba ewu. Nenku mémè ngukaadi mukwate cyâlu cyônsò. Pa nanku mémè ngudi mwangate Papa yônsò ne kakwena kaaba nansha kakese kashaale bwebwe wêwè to."

⁵¹ Mushindu awu ke utu bamwe bantu bateeta kudyelela meejî pa bidi bitangila ntendeleelu, kî mmwômò anyi? Uh-huh. Aci's ncyà bushuwa.

⁵² Nenku kaa'Sarah katekete aku kakwate ne bya luse, e kubetekaku kashiku kaaku kakese aku, ke twîsù twaku tukese tufiike atu kujuuka e kuntangilatu, ke kubangaye kudila mwadi. Kadi Becky uvwa ne ditama dyende ditwe ku dyanyi, kacya wangeela kâpà. Ntu mumunange. Ke Sarah kubangaye kuumuka kuya bwalu Becky nyawu ukaavwa mwangate Papa yônsò. Mémè kukonya cinù cikwabo eci mu mushindu ewu ne kumulobesha ne cyanza *nunku*. Kaa, kudikoleshaye ne lukasa lwônsò e kulwaye lubilu, kutupikaye e kusômba pa cinù cyanyi mu mushindu wa ne... Kavwa mwanji kwikala panu ntanta mule to ne mikolo yende kayivwa mwa kufika panshi to. Yêyè uvwa utetuka

ndambu (pàmwápa, anu bu mûntù mêmè, anu utetuka ndambu, nudi bamanye's), nenku kavwa . . . kavwa mwa kufika panshi to. Yèyè kavwa dingumba dinene to, nudi bamanye's, ne pa nanku kavwa mwa kufikisha makàsà panshi peetu paa pashindame apa to. Kavwa mwanji kwikala panu ntanta mule mukumbane to.

⁵³ Ne pa nanku, ùvwa bu uvwa wenda musendame, ke mêmè kumuḡingila maboko ônsò abidi nunku *ewu* ne kumwela kâpà mutambe kumulamika kûndi, ne kwengejaye twîsù tukese tufiike atu, ne kutangilaye paanyima kudi Rebekah. Kwambaye ne: “Rebekah, wêwè yàâyânyì,” yèyè—yèyè ne, “bidi mwa kwikala bulelela ne wêwè udi mwangate Papa yònsò, kadi ndi muswe umanye cintu cimwe eci ne: Papa mmungangate mêmè yònsò.” Nanku . . .

⁵⁴ Aci's . . . Piikalabi anu ne Yèyè mmungangate mêmè yònsò. Ndi mufwanyine kwikala nciyi ne tulaasa tulonga bwa kwamba patooke bintu binene, kadi bu mûncìdì anu mumanye ne Yèyè mmungangate mêmè yònsò, mu ditetuka dyanyi amu, muMulekele anu munḡingilè maboko ônsò abidi, necyènzè anu ne ngiikale mudyúmvwè bîmpè.

⁵⁵ Ee, twánjààyi kulambulaku mwaku mukwabo mukese wa disambila kudi Ye kumpala kwa twètù kubuulula Dîyi.

⁵⁶ Mpindyewu, Taatu wa mu Dyulu, tudi bamanye ne tudi peetu anu bu bânà batekete. Ne—ne Wêwè utu munange kwikala neetu, ne kukuukwila neetu. Nenku bu mutudi tuKukuukwila, ne Wêwè mutunange, ne mutukwate mu maboko Ebe, ne upwekesha Nyuma Mwîmpè Webe, ne wenza bwa tumanye ne Wêwè udi ne mwoyi ne Udi Taatu wetu, tudi tuKwela twasakidila wa manza tente. Mpindyewu, Nyuma Mwîmpè alweku kutudi diloolo edi. Nangaku mwoyi ne mwoyi wònsò, Mukalenge. Tupeesheku dibenesha dipyadipya. Twicìkijilèku mamata a lumuma a luse, Taatu. Kutangidiku ku mpekaatu yetu to. Mmipite bûngì. Mukalenge, uyifweku anu luse cyanaana. Ùyilekèlèlèku, Taatu, kadi ùtwángàtèku anu mu maboko Ebe, ne—ne wondopeku masaama etu, ne—ne ukezuleku misuuka yetu, ne upeesheku nyuma yetu budishikaminyi, Mukalenge, bwa twamona mwa kuKukuukwila ne kuKutumbisha, biikale bu bânà bakese banyeemakanangana mu nzubu, bamanye anu ne Taatu udi munkaci mwa kututangila. Enzaku nanku, Mukalenge.

⁵⁷ Mpindyewu, muntu nansha umwe kênàku mukumbane bwa kuu—kuumvwija Dîyi to. Tudi bamanye nanku. Yone wakamona Mukanda mu cyanza cya dyabalume cya Yèyè uvwa musòmbe pa nkwaswa wa butumbi, ne kakuvwa muntu nansha umwe mu dyulu, anyi pa buloba, anyi mwinshi mwa buloba uvwa mukumbanyine bwa kwangata Mukanda bwa kuwubuulula, anyi kulamuna bitampi to. Kadi ke Mwânà wa mukooko udi usemena wawa, uvwa mushipa kacya ku difuka dya dyulu ne buloba. Nenku Yèyè ke uvwa mukumbanyine. Ne

Yèyè wakangata Mukanda awu, ne wakalamuna bitampi, ne wakabuulula Mukanda awu. Éyì Mwànà wa mukooko, lwâku diloolo edi. Tubuulwileku Mukanda awu, Taatu, bu mutudi baKutekemene Wèwè, bwalu tudi tulomba nunku mu Dìnà dya Yesu, Mwànà wa mukooko wa Nzambi. Amen.

⁵⁸ Ndi musungule, diloolo edi, mvensa mukese wa Mufundu wa myâkù isatu kaaba aka. Kadi dyambedi ndi muswe kubala mvensa umwe anyi ibidi mu Yone Munsantu, nshapita wa 11 kubangila ku mvensa wa 23.

Yesu wakamwambila ne: Mwaneenu wa balume awu neabiike cyakabidi.

Marta wakamwambila ne: Ndi mumanye...neabiike cyakabidi mu dibiishiibwa dya ku lufu dya ku dituku dya ndekeelu.

Yesu wakamwambila ne: Mémè ndi dibiika dya ku lufu, ne...mwoyi; ewu udi ungitabuuja mémè, nansha byòbì ne mmufwe, kadi neikale ne mwoyi;

Ne ewu yònsò udi ne mwoyi ne ungitabuuja mémè kadyakufwaku to. Udi witabuuja aci anyi?

Yèyè wakamwambila ne: Eyowa, Mukalenge, ndi ngitabuuja ne wèwè udi Kilisto, Mwànà wa Nzambi, uvwa ne cya kulwa pa buloba awu.

⁵⁹ Nenku bwa cyena bwalu ndi njinga kwangata myâkù isatu eyi ne: *Udi Witabuuja Aci Anyi?*

⁶⁰ Ngâkabala bwalu bulonda kampanda kukaadi ntanta. Ngeela meeji ne civwa mbwalu bulonda bufwikakaja. Ne ciibûngi cya bambi bônsò aba, ngeela meeji, bakaadiku anu babale mukanda wa Dr. Ingraham wa—wa *Mwànà Wa Mfùmù Wa Mu Nzùbù Wa Davidi*. Mmukanda munene. Ùdi, ngeela meeji, kakuyi mpatà to ne ukaadi mupatuke ku dituuta dya ku cyamu. Ndi muswe bwa kwikala naawu mutuuta ku cyamu, bwa ngaamona mwa kuwufikisha munkaci mwa bantu.

⁶¹ Nenku mu wòwò amu, mvwa mbala bwalu bukesa kampanda pa Lazàrò ewu, ne pa Yesu, ne Mariya, ne Marta, bàvwà, bàrà baabo baa bakaji ne Lazàrò. Nenku mvwa mbalamu ne ke mwaba uvwa Yesu musòmbèle, ngeela meeji, ne Marta ne Mariya. Bubidi bwabo bavwa nsongaakaji milenga ya beena Ebelu. Ne Lazàrò uvwa ulonga anyi uyila bwa kushaalaye mufundi mu ntempelo, ufundila baakwidi mikanda ya mikenji ya Mòsà.

⁶² Nenku Yesu uvwa mudyè bulunda bwa sheemàsheemà, nangananga ne Lazàrò. Patudi tubala mu mukanda awu pa mwaba uvwaYe ulwa kumbelu kwabo aku, nenku Marta uvwa ne njingajinga ndambu bwa diteeleja dya mèyi Ende, kadi bivwa bimukengela bwa kulongolola byakudya ne kuteeka ku meesa, kadi Mariya yèyè uvwa anu kacya wàsòmba ku makàsà Ende.

Kadi Yesu wakamba ne Mariya uvwa musungule bintu bitambe bwimpè.

⁶³ Ke pashiishe, twêtù kuyiila ne Lazàrô ke wâkafikisha Yesu kudi Yone, mu bwalu bulonda bwa mu mikanda ya Dr. Ingraham ayi, ne. . . pa bwalu bwa *Mwânà Wa Mfùmù Wa Mu Nzubù Wa Davidi* abu. Nansha nanku, aci ncifwanyine kwikala kaciyi cilelela to, ncyênà mumanye, kadi anu bwa mwaba wa kucishindamijila cyanaana, kadi Yèyè uvwa ne cya kwikala musòmbèle kwabo aku.

⁶⁴ Mpindyewu, tudi bayiile lumingu lulwalwa, lumingu lushaale elu's we, ne Yesu mmwambe mu Yone Munsantu 5.19 ne: “Mêmè. . . Mwânà kèna mwa kwenza cintu nansha cimwe mu Yèyè to, anu cidiYe umona Taatu wenza aci: ke cidi Mwânà wenza pende. Taatu udi ukwata mudimu ne Mwânà ucidi ukwata mudimu too ne kataataka.” Nwamonu anyi? “CidiYe umona Taatu wenza aci.”

⁶⁵ Nanku bwa kuvwija cyôci eci bwalu bulonda bwa cya bushuwa, Taatu, Nzambi, uvwa ne cya kwikala mwakule ne Mwan'Ende, Yesu, mwambe ne: “Mulunda Webe, Lazàrô, neafwe, kadi neciikale bwa dyakalenga kampanda, nanku Wèwè umuka kumbelu aku. Umuka uye, bwalu nebalombe bwa Wèwè kumusambidila, anyi, kumusangaja, paabi—paabi Mêmè ncyèna muswe bwa Wèwè kwenza aci to.” Bu nwênù mwa kutangila bwalu bulonda abu patudi twenda tuya naabu apa, nenumone mudibu buya kuupuka ku bulelela mene bwa cyôci aci. Pa nanku, Yesu, kayi mufile didimwija nansha dimwe anyi cintu kampanda to, wakuumuka kumbelu aku ne wakaya mwaba wa cyanaana, kayi mupingane diloolo adi to. Nanku Wakaya ku bimenga bikwabo. Kadi Yesu mmwenze anu uumuka kumbelu aku, pa dibà adi lutatu paalu e kumba kubwela.

⁶⁶ Nanku padi anu Yesu uumuka kumbelu kwebe, lutatu lukaadi mu njila lwenda lulwa. Vuluka anu ne, padiYe anu uumuka kumbelu kwebe, lutatu lukaadi mu njila lwenda lulwa. Panukaadi anu ne tusumbu twa bunyaana ne bikwabo bikwàta mudimu mu ekeleeziya wenu anu bîmpè menemene, byenze bu motèèle munene wa cylindres dikumi ne isambombo wa Rickenbacker, kadi bashiye Yesu pambelu pa cyôci aci, padi anu Yesu uumuka mu ekeleeziya wenu, lutatu lukaadi mu njila lwenda lulwa. Eyowa's, mukalenge, padi anu Yesu uumuka mu dingumba, padibo baMuteeka ku luseke bamba ne: “Ee, mpindyewu twêtù katwena anu twitabuuja ne bintu ebi mbifwanyine kwikala bilelela menemene to,” kadi nwitaba cintu kampanda cikwabo, lutatu lukaadi mu njila lwenda lulwa. Nwavulukaayi anu aci.

⁶⁷ Cidi cimvulwija bwalu bulonda bwa Mukalenge Yesu, budi busanganyiibwa mu Mukanda wa Luuka. Nudi bamanye pacivwaYe anu mwânà wa balume wa citende wa bidimu bitwe

ku dikumi ne bibidi, baa Kwabo baye Nende, bu muvwa cilele ku cidimu ne ku cidimu, ku difesto dya Mpenta. Nenku pavwabo mu cimenga cya Yelusalema ku difesto ne bapicila mu cikondo cya dicyonkomoka apu, tudi tusangana mu Bible ne, baakenda matuku asatu kabayi Nende to. Ke bôbô kudyelela meeji ne pàmwâpà, bacyângàte paabo anu bu ne ke mudici amu, ne Yesu uvwa ne cya kwikala munkaci mwa bamwe baa ku bilongo byabo. Mpindyewu, twètù katwena mwa kwenza aci to. Paakafikabo ku diya kakebulula mu bilongo byabo biine bwa kujandula, Yèyè kavwamu to.

⁶⁸ Nenku katwena mwa kucyangata bu ne ke mudici amu to, anu ne bwalu nyawu tudi ba-Méthodistes, ba-Baptistes, ba-Presbytériens, beena Mpenta, ne mudibù wetu ne bankambwa beetu bavwa beena kwitabuuja banene, tudi tucyangata anu cyanaana, ee, bu ne ke mudici amu, ne Yesu udi neetu. Katwenaku mwa kwenza aci to. Bikengela twikale mu dipetangana Nende ku dituku ne ku dituku ne ku kasunsa ne ku kasunsa. Kaa, ndi munange aci.

⁶⁹ Mémè ndi muswe cidi Nzambi wikalangana mpindyewu. Civwa naaci baledi baanyi aci, civwa naaci bankambwa baanyi aci, ncilenga be, kadi (Civwabo naaci aci ncîmpè.) ndi mémè ngeela meeji ne tukaadi baye kule bikole be mu njila.

⁷⁰ Tumonaayi cidiYe leelu ewu. Mémè nciyu muswe kutangila paanyima bwa kumona cyakenza Mukalenge Moody to, bwalu tukaadi baye kule bikole be mu njila kutamba pavwa Mukalenge Moody apu. Lutatu ludi naalu ekeleeziya yetu ndwa ne: tudi twètù tutangila paanyima twamba ne: “Ee, tumonaayibi cyakamba Mukalenge John Wesley, cyakamba bamwe baa ku bakwabo abu.” Ke cidi cyenza ne maalu a mamanya ikale maye kule bikole menemene mu cyabo cipaapu, kutamba mùdì ntendeleelu mu cyende.

⁷¹ Kukaadi bidimu nkama isatu kaaba aka, mwena maalu a mamanya kampanda wa beena France wakajaadika ne wèwè mufwanyine kunyeema lubilu lukole lwa kànyingunyingu lwa miles makumi asatu ne itaanu [kilomeeta 56] ku dîbà dimwe, bukole bwa dikokiibwa dya kudi buloba mbufwanyine kukuumusha pa buloba wèwè kubuuka. Nudiku peenu nwela meeji ne maalu a mamanya mmafwanyine kupingaja meeji ku ciine aci leelu ewu anyi? Bakaadi banyeemesha lubilu lwa miles cinunu ne nkama citeema [kilomeeta 3.040] ku dîbà dimwe ne batungunuke anu benda baya. Bôbô mbakoleshe benda baya anu kumpala, batangile anu kumpala. Kadi twètù tutu baswe kutangila paanyima bwa kumona cyakamba Moody; cyakamba Sankey; cyakamba Finney; Knox, Calvin; bamwe baa ku bôbô abu. Cyakambabo aci’s civwa cîmpè. Aci civwa mbwa cyabo cikondo, kadi twètù’s tuyaaya batungunuke.

⁷² Kaaku wanyi mulume wakendesha ditempu dya ngombe. Mêmè ndi ngendesha mashinyi a Ford V8. Wanyi mwânà wa balume nëndelè mu kandeke kaa jet. Mbwenà kwamba ne, tudi tuya batangile kumpala. Ke civwa cikengela bwa ntendeleelu kwikalaye. Dilwa dya Mukalenge didi pabwîpî. Bivwa bikengela bwa ekeleeziya kwikalaye uya mutangile kumpala mu makole abo. Maalu a mamanya adi anu mwa kubanda muulu too ne mwaba kampanda kadi pathiishe bikengela amate panshi, kadi twètù tudi ne mishimi idi kayiyi myanji kusuna to, itubo kabayi banji kulenga kacya, ya bukole, kabuyi mikalu, bwa Nzambi, buvwa bukengela twètù kwikala tubwelamu. Tudyà cyômbè ne bululu kadi peetu ne dijiba, bashaadile mu ntanta wa muliyô wa kilomeeta diloolo edi, kwa maneeme adi beena Kilisto mwa kusankila. Ndi ndyumvwa mêmè mwine bundu pândî ntangila pambelu apa mmona mpitaadi, ne masaama, ne ntatu bidi kacya anu byangatangana mpindyewu mene. Ekeleeziya wetu's nguvwa ne cya kwikala ubanda ne musêèsù, wenda wondopa ne babeedi, ubiisha bafwe, wipata badémons, wenza bimanyinu ne maalu a kukema, ufikisha buloba bujima ebu ku dijingulula ne Yesu Kilisto udi ne mwoyi. Ke cidi citukengela bwa kwikala twenza ncyôci aci.

⁷³ Mona's, wêwè udi wamba ne: "Mukalenge Moody kacya. . . ." Mukalenge Moody kavwa ne mwoyi mu edi dituku to. Ncya bushuwa. Twètù tudi ne mwoyi mu Dilwa dya Mukalenge. Kadi twètù tudi anu twitaba aci bu ne Yêyè uvwa ne bilongo byetu abi. Kadi dituku dikwabo pavwa mwedi wa kadyombo kampanda mwele Mukalenge Graham kadyombo, twètù's twâkajandula ne Yêyè kavwa munkaci mwa bilongo byetu abi.

⁷⁴ Badi baMupetela penyi? Mpenyi paa—mpenyi paakapetelabo Yesu? Anu mwaba mene wakaMushiilabo awu. BaakaMushiila penyi? Ku difesto dya Mpenta. Mpenyi patudi twètù tushiila Yesu, ekeleeziya wakaMushiila penyi? Ku difesto dya Mpenta. Patudi tuya kule ne bukole bwa Mpenta bwa nkùlukulu abu ne difesto dya Mpenta, tudi tuya kule ne Yesu. Aci ncya bushuwa menemene, mulunda wanyi. Tudyà cyômbè ne bululu kadi peetu ne dijiba. Eyowa's, mukalenge.

⁷⁵ BaakaMushiila ku difesto dya Mpenta, nenku ke mwaba umwepele ngwôwô awu wikala ba-Méthodistes, ba-Baptistes, ba-Presbytériens, ne beena Mpenta mwa kuMupetela, nkwalukila ku mwaba unuvwa baMushiile awu. Disanka dya Mukalenge dyèpî? Bukole bwa Mukalenge bwèpî? Ekeleeziya udi wela lukonko leelu ewu ne: "Cidi cyenzekele Nzambi wa maalu malonda awu ncinyi—ncinyi?" Yêyè mmwindile bwa bantu Bende baMubiikile bwa amate mu cyalu. Kadi ba. . .

⁷⁶ Katwena mwa kucyenzela ku mangumba to. Katwena mwa kucyenzela ku dilonga dya nsômbelu to. Katwena mwa kucyenzela ku dilonga dya makumi a bishiferi to, anyi katwena mwa kucyenzela ku dilonga dya tulaasa to. Tudi tutapuluka

twêtù biine, tupanduluka. Twêtù katwena bapanduluke to. Tudi anu menemene muntu umwe mu Kilisto Yesu. Tudi bônso umwe mu Kilisto, kadi mangumba etu kaàdyakucyènzakù to. Nansha mudiwu malenga amu, kaàkucyènza to. Dilonga dyetu dya tulaasa's ke cipumbishi citambe bunene cya kacypu Evanjeeliyo wapeta, s'ndilonga dya tulaasa.

⁷⁷ Cidi citùkèngelà kî ndilonga dya tulaasa to. Cidi citùkèngelà mbukole ne dileeja patooke dya Nyuma Mwîmpè walukila mu ekeleeziya bwa kuleeja bukole patooke. Yesu kavwaku mwambe ne: “Ndaayi pa buloba bujima nu—nukalongshe” to. Yêyè kavwaku mwambe ne: “Ndaayi pa buloba bujima nukenze...” to. Yêyè wakamba ne: “Ndaayi pa buloba bujima nukayishihe Evanjeeliyo.” Ne Evanjeeliyo nkuleeja patooke kwa bukole bwa Nyuma Mwîmpè, dibiishiibwa dya ku lufu. Tucidi anu bashaadile mu ntanta wa muliyò mujima wa miles [kilomeeta 1.500] ne mwaba uvwa ukengela twêtù kwikala. Tuyaayi batangile kumpala. Tupinganaayi mwaba utudi baMushiile ku difesto dya Mpenta.

⁷⁸ Yesu wakamba, mu Yone, ngeela meeji, nshapita wa 15, Wakamba ne: “Mémè ndi Mwonji wa mvinyo; nwênù nudi matamba.” Nenku mpindyewu, Mwonji wa mvinyo awu wôwò mupatule ditamba dya kumpala, ne ku ditamba adi kufundawu mukanda wa Byenzedi, ditamba diibîdî's nedyènzè mukwabo mukanda wa Byenzedi. Ditamba diisâtù's nedyènzè mukwabo mukanda wa Byenzedi. Ne ditamba dyônso dyapatuka ku Mwonji wa mvinyo awu's nediikale dya mwomumwe anu muvwa ditamba dya kumpala adi.

⁷⁹ Mpindyewu, udi mwa kusomeka, bwa aci tudi bamanye. Nkaadiku mumone mucu wa didimà mukwame bimuma mishindu mishiilangane mitwe ku mwandamukulu. Nkaadiku mumone mucu wa orange mukwame bimuma bya mbòmà, ne bimuma bya mpùsù, ne bikwabo byônso, kadi bivwa bisomeka.

⁸⁰ Ke lutatu ludiku leelu ewu ndwôlò alu. Tudi basomekemu mmwenenu yetu, basomekemu mangumba etu, kadi mucu awu wôwò anu mudidinge mukwame kamuma kakwabo kaa mvinyo, kôkò kiine, nekafwanangane ne twa ku cibangidilu twakayamu atu. Aleluuyah! Kaa, ekeleeziya's neasambakane bônso pamwe, kadi cidi citukengela twêtù mbukole bwa ku cibangidilu abu. Cidi citukengela n'Nyuma Mwîmpè, bukole bwa dibiishiibwa dya ku lufu dya Yesu Kilisto. Ke cyakatwambilaYe bwa twêtù kwenza.

⁸¹ “Mémè ndi Mwonji wa mvinyo, nwênù nudi matamba.” Mwonji wa tumuma twa mvinyo wôwò anu mupatule lutonga, ne lupatuka ne tumuma twa mvinyo tulenga twa bleu, mwonji wa mvinyo wàlonjà wapatulawu newukwame tumuma tulenga twa bleu. Piikalabi ne Mwonji wa mvinyo wa kumpala wakapatuka, ne bôbô kushaala mwinshi mwa bwenzeji bwa Nyuma Mwîmpè,

ne kwenzabo bishima binene, ne bimanyinu, ne kutwabo citampi bujaadiki bwabo pa buloba . . . Nansha bààbúngì baabo ne bujaadiki bwabo bóbò biine, bóbò abu, ne mashi abo, baakatwa citampi ku bujaadiki bwabo. Baakapicila mu njiwu mikole ya mishindu yònsò ne bikwabo bwa kutwala Evanjeeliyo. Baakayooba; baakatuuciibwa; baakanyookiibwa. “Tudi ne cya kwambwibwa kuya kwetu ku Dyulu pa bulaalu bulengeja ne bilongo bwa maalu mapepele, padi bakwetu balwangane mvita bwa kupeta difutu, ne bapicile mu mbû ya mashi anyi?” Citudi batekemene ne netwènzè ncinyi? “Ndi ne cya kulwangana mvita piikalabi ne ndi ne cya kukookesha. Mbandishileku bukitu bwanyi, Mukalenge.” Cya bushuwa. Bidi bitukengela . . .

⁸² Kabyena bitukengela dingumba dipyadipya to. Kabyena bitukengela citanda cipyacipya cya ekeleeziya to. Cidi citùkèngelà leelu ewu nditabuluja dya kale dya Mpenta dya mu meetu, dya kuulu kakuyi byuluulu, dya dishipa mpekaatu, dyàkalediibwà ku Mpenta kadi dyalukile cyakabidi mu ekeleeziya adi, bukole bwa Nyuma Mwîmpè cyakabidi, bwa kubweja Yesu mu cyalu.

⁸³ Nzambi wa maalu malonda awu utu misangu yònsò ujuuka mu cyalu mu dîbà dya ntape nkutape. Ke cidi citùkèngelà. Ke lutatu ludi naalu ekeleeziya wetu leelu ewu ndwòlò alu. Tudi twalukila paanyima ntanta mupitepiteme bule. Tudi twenda tutùkina mu bilele bya baa pa buloba. Ne ku kakese ku kakese, ku cidimu ku cidimu, cidi cibanga kufwa ndambu ne cyuminyina.

⁸⁴ Kulwalwa cikondo cya disonza abidi adi panshi aa. Nzambi neamusonze bulelela anu mûndi mwimane mu cyambilu eci emu. Nzambi neamusonze bwa kumukwamishisha mamuma. Neasonze uumushe byenzedi bya pa buloba dimwe dya ku matuku adi panshi aa. Bundu be, mushindu udi ekeleeziya mutungunuke mu dîna dya ntendeleelu.

⁸⁵ Nenukudi tusangana ne, paakuumuka Yesu, lufu lwakabwela. Padi Yesu uumuka mu ekeleeziya wetu, bukole bwa Nyuma Mwîmpè buumuka mu ekeleeziya wetu, udi ubanga kufyetelela ne—ne ufwa. Ne paanyima paa cikondo kampanda kakwena kantu kakwabo nansha kamwe bwende yèyè to. Mpindyewu, paakuumuka Yesu, lufu lwakabwela. Kaa, ncikondo kaayipu cya dibungama’s we.

⁸⁶ Kadi monaayi, baakadyela nkonko, e kutumabo bantu bwa kubiikila Yesu, kadi Yèyè kaakalwa to. KuMutuminabu kabidi bantu, kadi Yèyè kaakalwa to, kadi Uvwa mumanye ciwyaYe ne cya kwenza. Yèyè mmumanye diloolo edi, ciikalaYe ne cya kwenza. Kî ncijimine bwende Yèyè to: mMumanye menemene anu cidiYe pabwîpi ne kwenza. Yèyè neajuule cisamba, bulelela anu bu mûndi mwimane mu cyambilu eci emu. Neajuule cisamba

bwa Dîná Dyende mu lukongo lwa baa Bisamba bya bende. Neacyènzè.

⁸⁷ Cikondo cya beena Yuda ncikaadi pabwîpî mpindyewu eci, ne cya baa Bisamba bya bende cikaadi cyôci cyenda cijika, bwalu báfumu ku dipatuka. Mbôbò aba munkaci mwa kubenga Kilisto; badi munkaci mwa kubenga bimanyinu byabo; badi munkaci mwa kubenga byônsò bidi bibiikidiibwa ne mbya difwana dya Nzambi, ne babitwa mênà mudibi lubuku lwa mushindu kampanda anyi bukole bwa démon ne benza... Badi bapenda Nyuma Mwîmpè ne badikangila bôbò biine kule ne Nzambi. Nenku Nzambi neangate banyaàbanyà abu, paanyima pa cikondo kampanda, ne kubabandisha ne kubavwija Ekeleeziya wa bukole, ne pashiishe kwaluja Nyuma kudi beena Yuda, kadi kuya ne Ekeleeziya wa baa Bisamba bya bende kumbelu. Cya bushuwa menemene. Yèyè udi munkaci mwa dyenjiibwa patudi twakulangana apa. Kaa, mushindu mwine's, tukaadi ku cikondo cya nshiikidilu, pabwîpî menemene.

⁸⁸ Yesu, Ûvwa mumanye. Nenku paanyima paa cikondo kampanda e kwambaYe ne: "Mulunda wetu, Lazàrô awu, mmulaale tulu."

⁸⁹ Mona's, ke bayiidi kwelabo meeji ne uvwa munkaci mwa diikisha ndambu. Yèyè kwamba ne: "Ee, piikalaye mulaale tulu, s'udi wenza anu bîmpè."

⁹⁰ Ee, Yèyè kwamba mu Wende...ngaakwilu wabo bôbò, bwa baamona mwa kuumvwa, ne: "Mmufwe, kadi anu bwenu nwênù Ndi ne disanka bwa mûmvwà Nciyipu to." Nwamonu anyi? "Bwenu nwênù, Ndi ne disanka bwa mûmvwà Nciyipu to." Bwalu nunku mbafwanyine kwikala baMulombe bwa—bwa kwondopa—bwa kumwondopa, kadi Yèyè uvwa mumanye ne Kavwa mufwanyine kucyenza to, bwalu cikeena-kumona cicivwa anu...paanyima paa matuku anaayi awu Yèyè uvwa mumanye ne ke cikondo civwa Taatu muMwambile. Bilenga be; ke Yèyè kwamba ku majambu aku ne: "Taatu, Ndi nKwela twasakidila, Wèwè ukaadi mumane kuteeleja, kadi Ndi ngamba eci anu bwa badi biimane kaaba aka aba." Nwamonu anyi? Yèyè ukaavwa mumane kumanya civwaYe ne cya kwenza. Ke Yèyè kwamba ne: "Nènye kamubiisha."

⁹¹ Mpindyewu, ndi mwa kudifwanyikijila ne kaadîkù kakese aku kakaavwa kacibuluke. Mubakebedi wa nshima muye, dibungama. Kaa, mbilenga be paudi ne dîkù dibungame anyi mwoyi mubungame, ne pashiishe Yesu upatuka cintuluntulu, kî mmwômò anyi? Ndi mwa kudifwanyikijila mmona Marta, mukaji mutekete mulenga kumona mwikale ne cibwikilu cifiike kwîsù, ne Mariya mutekete awu, ne biikale bakwatangane ku byanza muntu ne mukwende, bamba ne: "Citwenza ke cinyi's? Papa ne Maman bamane kufwa, ne mwaneetu wa balume wa mushinga mukole...Mpindyewu, tukaadi buumuke mu

ekeleeziya, baa bwalu biipaciibwemu, ne bapatuke bwa kulonda Yesu wa mu Nazaleeta. Kadi nyewu Wāshì lwendu wātūshiyi, muye nî mpenyi.”

⁹² Ndi mwa kuumvwa mudyudyanganyi ulwa mwaba awu wamba ne: “Tètè suu, Mwondopyanganyi wa kudi Nzambi awu wēpi, Muprofeta wa mu Ngalela awu? Ûdi penyi mpindyewu? Nwamonu’s, pakaadibi ne ke cikondo menemene cya kwenzaYe cintu kampana ncyôci eci, mMulapüle muye.” Ke bwalu abu’s. Nwamonu’s, Nzambi utu munange anu kwenza nanku, anu kulekela bwa bantu, anu, kulekela bwa bantu baleeje cidibo, eyowa’s, ubateeta anu bwa kumona cidibo menemene. Ûdi ubapa dibenesha. Ûdi umweneka, uDileeja, uDiteeja Yèyè mwine kudi bantu abu, anu bwa kumona ne ndibinduluka dya mushindu kaayi dyaleejabo, anu bwa kumona ne ncinyi cyenzabo pa bwine bwalu abu.

⁹³ Mpindyewu, tudi pashiishe tusangana ne, paanyima paa—paa ndambu wa matuku, matuku anaayi, mukwacikwetu Lazârô ewu ukaavwa mufwe. Bakaavwa bamujiike. Dituku diibîdi, dituku diisâtù, dituku diinâyì. . . Mpindyewu, muntu yônsò wendenda ewu mmumanye ne dibola ditu dibanga paanyima paa matuku asatu: dyûlù dyànji kubeetelela pa mpala apu, dyambedi. Ne pa dîbà adi dibola dibanga; misanda ya mu dikoba ibanga kudya mubidi. Bakaavwa bamwele mu buloba, bateeke dibwe dinene kumutu kwa ngombà muvwabo bamwele amu. Nenku ku musangu ne ku musangu, nsongaakaji ya bitende ayi iwva mwa kupatuka e kuya katwa binù ku majambu aku ne kudila mwadi.

⁹⁴ Ke paanyima paa cikondo kampana, luumu kutampakanalu ne: “Yesu wālu. Tudi baMumone ubwela mu cimenga emu.” Kaa, Marta mutekete awu, mwine uwwa mene, bwa pa kutangila, bu uwwa ne njingajinga pa bwalu abu awu, pa dîbà adi ke kuleejaye patooke ciwaye mwenjiibwe naaci. Ke yèyè ulwalwa ewu. Nyèyè awu ulwa mu njila pa dîbà adi, mupatuke lubilu wenda ukeba. Ndi mwa kuumvwa bamwe baabo kumpenga kwa njila aku bamba ne: “Ee, ngeela meeji ne wèwè washiishi kutwishiibwa mpindyewu ne, ntendeleelu wenu awu uwwa wa mafi’s.” Yèyè kaakabacyukaku to nansha kakese kadi wakaya mutangile anu kumpala, upita anu badyudyanganyi bônsò abu. Kupwekaye too ne paakaMumonaye, pâmwâpa musòmbè panshi mu disangu dya mùsèèsù.

⁹⁵ Mpindyewu, bivwa byenze anu bu ne, ùvwa ne cya. . . ùvwa mufwanyine kwikala ne bukenji bwa kuMudyula ne—ne kuMwamba bibi. Mona’s, yèyè kaakayaku lubilu kwamba ne: “Mona’s kwaka, mona’s kwaka, Wèwè. Wèwè ewu’s udi ne cya kwikala Muprofeta, Muntu wa Nzambi. Bwa cinyi Kwèna mulwe patuvwa baKubiikile apu? Mona’s, twètù kushaala tudingidingi twa kusekabo mu cimenga mpindyewu. Peetu bapatuke mu ekeleeziya wetu bwa kuKulonda Wèwè ewu.” Bivwa byenze anu

bu ne ùvwa ne bukenji kampanda. Kadi nudi bamanye's, anu bu mûmvwà muyiishe pa ne: *Mwânà Wa Mukòòko Nè Nkuci*, piikalabi ne tudi mwânà wa mukooko, mwânà wa mukooko utu ujimija bukenji bwônsò budiye naabu. Ncya bushuwa menemene. Kêna ne cingà cintu to anu myôsà, pa nanku's bikengela ayijimije. Nenku wêwè udi ujimija bukenji bwônsò bûdi naabu bwa wêwè kukwacila Nzambi mudimu. Aci's ncyà bushuwa menemene.

⁹⁶ Mvwa ndumbatangana ne bakaji pa mushindu udibo bavwala tulàmbà tukese twa kale etu, nudi bamanye's, kadi kwambabo ne: "Ee, twêtù's—twêtù's tudi beena Amerike. Tudi mwa kwenza cyônsò citudi baswe kwenza aci."

⁹⁷ Mêmè kwamba ne: "Aci's ncyà bushuwa menemene, kadi pawikala mwânà wa mukooko, neujimije makenji ebe." Banwa mfwanka ne benza lukutukutu lwa mushindu awu, aci's ke cintu cya citambe bubu cikaadiku mukaji mwenze kacya. Aci's ncyà bushuwa menemene.

⁹⁸ Inăbànzà kampanda mmungambile, anu abidi adi panshi aa, mwikale uyiikilangana naanyi, kwambaye ne: "Kadi, Mwaneetu Branham, kabacyena benza kabidi bilàmbà bya mushindu mukwabo to."

⁹⁹ Mêmè ne: "Kadi's bacitu anu benza mashinyi a bilàmbà ne bapaana bilàmbà. Kakwenaku kabingila nansha kaa kânà pa bwalu abu to." Aci's ncyà bushuwa menemene.

¹⁰⁰ Wavuluka ne, dîngà dituku, udi mwa kwikala panwapa apa mukezuke kudi bayeebe, kadi neukalumbulule bwa masandi pa bwalu abu, anu mudibi bulelela ne: "Ewu yônsò ukâtàngidi mukaji bwa kumwalakana, ukaadi mumane kwenda nende masandi munda mwa mwoyi wende."

¹⁰¹ Lutatu lùdiku leelu ewu kudi bakaji baa beena Mpenta, ke bwalu bûndi mêmè ndikonka's. Mushindu mene unukaadi baye kule ne njila wa kale uvwa usongangana awu's. Mushindu uvwa baamamwênù ne ciibidilu cya kulama nsuki mile's, kadi leelu wa Ndaaya ewu bakaji baa beena Mpenta bakaadi badifiita bilaabu benze bu musumba wa bantu mu Diibîdi didi didyanjidila Diisâtù dya butu, biikale bakosa nsuki yabo, ne bavwala tulàmbà tukese twîpi twa kale mushindu awu, anu bu bakwabo bônsò baa mushindu. . . bapatuka pambelu beela kupèkupè mu mashinde mu lupangu mu mēbà a mapingaja, apu mpadi balume bapicila kuntu aku, udiku peebe ufika ku dyumvwa, wêwè mukaji, ne newikale ne cya kulumbulula bwa dyenda dya masandi ne bôbò balume abu anyi? Wêwè mwine's ngudi mudizanjike kudibo mu kiipacila aku. Cintu nnyuma mubi pa ekeleeziya ne pa bantu, kadi kabayi bacimanye to. Mbampofu kadi kabayi bacimanye to. Cidi mbulelela.

¹⁰² Pâmwâpa udi mufwanyine kwamba ne mêmè ncyêna ne bukenji bwa kwamba aci bu mutangadiki to. Ee, mêmè—

mémè bikengela ndonde bulombodi bwa Nyuma Mwîmpè; ke cyônsò cîndîku mwa kwamba ncyôci aci. Wêwè... Mémè mukatwilangane neebe ku cilumbulwidi, pa dibà adi kabyakukengela bwa ngiikale ne mashi ebe pa byanza byanyi to. Nyeema kule ne katupa kwônsò kaa buloba kadi kafwanangane ne Sataana. Shaala kule naaku. Umukaku. Nansha kwikale bakajaana badi bende luumu baa ku télévîsion bûngî munyi. . . Wêwè kwêna, kaaba aka, bu mukajaana udi mwende luumu wa ku télévîsion to; udi mwânà wa bakaji wa Nzambi.

¹⁰³ Mwva nyiisha dinda dikwabo mu ekeleeziya wa mpaasata kampanda, pa bwalu bwa mupika kampanda wa kale, cikondo cimwabo bapaanyisha bapika kukaadi ntanta mule. Nenku bavwa ne ciibidilu cya kulwa kuntu aku kadi kubasumba mu disumbishilangana dya bintu. Nenku bantu bavwa, bavwa badila, baasa myadi, bwalu bwa ditunga dya kwabo; kabavwaku bafwanyine kukwalukila kabidi to. Nenku bivwa bikengela bwa kwikalabo babeela mfimbu. Ne bavwa mwa kubasumba anu munudi bafwanyine kusumba mashinyi a kadyendelandela emu, anu ku cintu cyônsò naka, mishinga kampanda, basumbisha bantu beetu baa maci ne meesu aba.

¹⁰⁴ Kadi dituku dikwabo, musumbi kampanda kulwilaye mwaba awu, mwendedyanganyi kampanda wa mushinga, ubwela mu bulongolo-. . .budimi bunene kampanda's we. Ke kwambaye ne: "Udi ne bapika baa disumbisha bûngî kaayi?"

¹⁰⁵ Awu ne: "Ee, ndi naabo ndambu baa dishintakaja." Bavwa mwa kuteeta kwangata baa banene abu. Kwangata baamaamu abu, baataatù abu. . . Mukaji uvwaye musele awu yêyè mwikale mukaji wa kalendalenda, bavwa bangata balume banene ba mibidi tumatuma aba babasanga ne. . . mushindu utubo basanga tubalu ne nyama awu. Kacya kabituku bîmpè to. Nzambi wakenza muntu. Muntu yêyè ngudi mwenze bapika. Kacitu anu cîmpè to twamb'eku twamb'eku, kacya. Nzambi katuku muswe bwa muntu nansha yêyè nganyi kwikalaye mupika nansha. To, mukalenge. Kabidi nansha. . . Tangilaayi numone cyakenzeka.

¹⁰⁶ Ke munkaci mwa byônsò abi, mwabilaayi awu kwambaye ne: "Ee, ndi muswe nsumbeku bamwe baa ku bôbô abu. . ." Yêyè kumona nsongaalume mukwabo wa citende mwaba awu. Kabiyi bikengela bwa kwikalabo bamwela yêyè mfimbu to. Cyende cibanga civwa anu cyela muulu, mutu mwela muulu, mwenze anu bu muntu mukalanga wetu wa bushuwa ewu, wendakana eku ne eku. Ke mwendedyanganyi wa mushinga awu kwambaye ne: "Ndi muswe mmusumbe yêyè."

¹⁰⁷ Awu ne: "Kadi awu kî ngwa disumbisha to."

¹⁰⁸ Ewu ne: "Ee, bwa cinyi?" Kwambaye ne: "Yêyè ke mfumwabo anyi?"

¹⁰⁹ Yêyè ne: "Bwâlà, s'mmupika."

110 “Ee,” mwakambaye, “bwa cinyi? Utu umudiisha bîmpè kupita bakwabo bônso anyi?”

111 Awu ne: “To. Ûtu udiila pambelu mu cikukù amu ne bakwabo bônso abu. S’mmupika.”

112 Yêyè ne: “Cidi cyenza ne ikale yêyè mutambe kushiilangana ne bakwabo bônso ncinyi?”

113 Ke mfumu awu kwamba ne: “Ntu paanyi mudikonkekonke mêmè mwine kukaadi ntanta mule, kadi dîngà dituku ke mêmè kulwa kujandula mùvwà bwalu. Kwaka mu ditunga dyabo, tatwëndè udi mfumu wa cisamba. Nenku nansha mudiye mwenyi kule ne kwabo kumulela amu, ùdi anu mumanye ne yêyè mmwânà wa mfumu ne ùdi uditwala yêyè anu bu mwânà wa mfumu.” Piikala aci. . .Piikala mwena Afrike wa mu mashi mufwanyine kujingulula ne tatwëndè udi mfumu, ne kuneeku mwenyi mu buloba bwenyi mwikale anu mwa kumanya ne dyamwamwa dya mbû yêyè mmwânà wa mfumu, mmushindu kaayi uvwabi mwa kukengela bwa bakaji ne balume kuditwalabo padibi ne nwênù aba nudi bânà baa balume ne bânà baa bakaji ba Nzambi? Enzaayi maalu bikumbanangane ne cyôci aci. Cya bushuwa’s. Ditwalaayi; dikezulaayi ne enzaayi maalu bu bânà baa balume ne bânà baa bakaji baa Nzambi. Kabyena bikemesha to, ngiikadilu kaayipu’s we.

114 Ke bwalu abu’s. Kaa, Marta mutekete awu, upatuka lubilu. Ûvwa umweka anu bu ne ùvwa ne mushindu kampanda wa mufwanyine kwamba cintu kampanda cya kuMupiishaye naaci. “Mbwa cinyi bùvwà Wêwè ewu mubengele kulwa kudi mwaneeu wa balume? Tangila bitudi baKwenzele, kadi Wêwè kutufwisha bundu.” Ee, bu yêyè mwambe aci, nunku mwanda ewu kî mmujike mushindu wakajikawu awu to. To, mukalenge. Mbilondeshile mushindu wûdi wêwè usemena pabwîpi ne dipà dya Bunzambi dya Nzambi. Piikalabi ne Nzambi mmutume dipà, bikengela usemene kùdidi mu mushindu mujaalame. Pawikalaku utekemena bwa kupeta nî ncinyi nî ncinyi ku dipà adi, bikengela usemene kùdidi mu mushindu mujaalame. Nenku Marta uvwa mumanye ciine aci. Ûvwa pâmwâpa mwa kwikala mubale bwalu bwa mukaji mwena Suunema ne mwanende awu. Nenku yêyè. . .Piikalabi ne mukaji mwena Suunema awu wakamanya ne Nzambi uvwa munda mwa Eliya, netutambe kwamba munyi bwa muvwaYe munda mwa Yesu? Cya bushuwa’s.

115 Pa nanku, wakayaku ne diseemena dya mushindu mujaalame. Wakayaku lubilu ne kudyupwila panshi ku makàsà Ende. Ndi munangepu aci’s we! Wakadyupwila panshi ku makàsà Ende e kwambaye ne: “Mukalenge. . .” Ke mwanzu Wende mulelela ngwôwò awu. Cyôci aci ke civwaYe. Yêyè uvwa Mukalenge wende. “Mukalenge, bu ne Wêwè uvwa mwaba ewu, nunku mwaneeu wa balume kî mmufwe to.”

116 Kaa, ekelekele! Kaa, ndi anu mwa kudifwanyikijila mmona mwoyi Wende munene awu paakatangilaYe mukaji mulenga kumona awu, binsonji bimupwekela pa matama. Wamba ne: “Mukalenge, bu ne Wèwè uvwa mwaba ewu, nunku mwaneetu wa balume kî mmufwe to.” Tangilaayi numone cyakambaye. “Kadi nansha mpindyewu, Mukalenge, nansha mudiye mufwe amu, nansha mukaadi misanda ya mu dikoba yenda idikoka mu mubidi wende amu, nansha mpindyewu, Mukalenge, cyònsò cyùdi Wèwè ulomba Nzambi aci, Nzambi neaKupeesheci.”

117 Kaa, s’ke munsokontu ngwôwò awu. Wèwè udi mufwanyine kwamba ne: “Ndi mwele bukondo mu lupitaadi ne lupitaadi lwònsò. Ngangabuka udi wamba ne nêmfwe, kadi nansha mpindyewu, Mukalenge...Ndi mucibwila yònsò panshi kudi binyoka; ncicyena mwa kunyunga to, kadi nansha mpindyewu, Mukalenge...”

118 Mwânà mutekete wa mu diboko awu uvwa ne mutu mudyundakanangane nseke yònsò makeelela diloolo awu *mona* bunene. Kuyi ne cyùdi mwa kwenza to nansha cimwe. Nunku ncitampakane ne citaayishe kaamutu kende kakese aku ne yèyè mufwe: “Kadi nansha mpindyewu, Mukalenge...” Yèyè ucidi anu Nzambi umwèumwè awu. Ûcidi anu Mukalenge umwèumwè awu. “Nansha mpindyewu, Mukalenge...” Ne Yèyè mmusòmbè ku dyabalume dya Nzambi wa Bukole bwònsò, wenza dyakwilangana pa bintu bitudi tujikula ne Yèyè mMutwènzèle abi.

119 Mpindyewu, ngădyŭmvùku mutendeleedi anu bya dikema ebi. Cya bushuwa’s. Nwênù’s nenungiinyike ne ndi munsantu mubunguluki wa mu malaba mu mishindu yònsò, pa nanku’s mbipiciibwe ne nwênù batwadije kucyenza, ne bacijikije.

120 Pa nanku, eyowa’s, mukalenge: “Nansha mpindyewu, Mukalenge, cyònsò cyùdi Wèwè ulomba Nzambi aci, Nzambi neàcyènzè.”

121 “Nulombaayi Taatu cintu kana cyònsò mu Dînà Dyanyi, Mêmè nêncyènzè,” mwakamba Yesu.

122 “Nansha mpindyewu, Mukalenge, cyònsò cyùdi Wèwè ulomba aci, Nzambi neaKupeesheci.” Kaa, aci’s civwa ne cya kwikala cinyunguluke mu mwoyi Wende munene awu’s.

123 Yèyè kwamba ne: “Mwaneenu wa balume awu neikale cyakabidi ne mwoyi.”

124 Yèyè kwamba ne: “Eyowa’s, Mukalenge. Neikale ne mwoyi. Ûvwa nsongaalume wa maalu mîmpè. Neabiike ku dibiishiibwa dya ku lufu dya bantu bònsò ku dituku dya ndekeelu.” Beena Yuda abu bavwa biitabuujja dibiishiibwa dya ku lufu dya bantu bònsò. “Neabiike mu dibiishiibwa dya ku lufu dya ku matuku a ndekeelu.”

125 Mutangilaayaaku. Ke Yèyè kudinanaye Yèyè mwine yònsò. KwambaYe ne: “Mèmè Ndi Dibiishiibwa dya ku lufu ne Mwoyi.” Kaa, ekelekele. Kacya kakuvwaku muntu mufwanyine kwamba aci kwònsò aku to. Kakwadyakwikalaku muntu nansha umwe paanyima, udi mwa kucyamba to. Yèyè ke Umwepele udi mwa kucyamba. “Mèmè Ndi Dibiishiibwa dya ku lufu ne Mwoyi,” mudi Mukalenge wamba. “Ewu udi ungitabuuja Mèmè, nansha byòbì ne mmufwe, kadi neikale ne mwoyi. Ne ewu yònsò udi ne mwoyi ne ungitabuuja Mèmè kaadyakufwaku to. Udi witabuuja aci anyi?”

126 Yèyè kwamba ne: “Eyowa, Mukalenge.” Kaa, yèyè uvwa mumanye ne cintu kampanda civwa pabwipi ne kwenzeka. Cidi ne cya kwenzeka.

127 Padi diitabuuja dya mu mwoyi wa meji matooke ditwilangana ne Nzambi, mènù a nkata awu adi anwangana anu mu mushindu ewu. Cintu kampanda cidi ne cya kwenzeka. Ndi ngeela bateeleji aba kadyombo diloolo edi, mu Dîna dya Yesu Kilisto, lekelaayi diitabuuja dyenu ditwilangane ne Nzambi mu mushindu awu, mu tusunsa tukese emu netwikale ne Mpenta mukwabo. Nekubwayike ditabuluja mu cimenga eci, mu mushindu wa kakuyiku kufwanyine kwikala mpulushi bûngi bukumbane mu ditunga emu bwa kubatwisha nyima panshi to. Ncya bushuwa. Nekwikale ditabuluja anu dyetu dya cya bushuwa edi. “Nansha mpindyewu, Mukalenge. . .”

128 “Ee, Mukalenge, tukaadi bakwacikile paa *cikampanda*; tukaadi benze *cikansanga*, ne benze *cikankenga*.” Cyûdi mwenze nansha ciikale cinganyi: “Nansha mpindyewu, Mukalenge. . .” Yèyè mmushaale mukwindile bwa wèwè kuMusoka. Yèyè. . . “Udi witabuuja aci anyi?” Cya bushuwa. Eyowa’s, mukalenge. “Nansha mpindyewu, cyònsò cyûdi Wèwè uMulomba. . .”

129 “Nudi baMwele penyi?” Mpindyewu, ke Yèyè udi upweka mutangile ku majambu wawa. Ûvwa anu muntu wetu ewu mufwanyine kudila mwadi; Ûvwa Nzambi mukumbane kubiisha bafwe.

130 Kukaadi cikondo kampanda kaaba aka, mukaji mukwabo wa mu cisumbu kampanda cya bantu. . . Ncitukù ncivwija ciibidilu bwa kucyenza pa bidi bitangila mangumba to. Kadi mukaji ewu. . . Kabatu bôbò biitabuuja ne Yesu uvwa Nzambi to. Batu bôbò bamba ne Yèyè uvwa anu muprofeta patupu. Mpindyewu, Yèyè uvwa. . . Piikalabi ne Yèyè uvwa anu muprofeta patupu, twètù bònsò tudi mu mpekaatu’s. Anyi Ûvwa Nzambi, kayi cintu cya cishaadile kudi Nzambi to, anyi Ûvwa museeswishi mutambe bunene ukaadiku baa pa buloba bapete. Aci ncya bushuwa. Yèyè uvwa mutambe ne muntu. Ke mukaji awu kwambaye ne: “Yèyè kavwa Nzambi to.”

131 Kudi bya nanku byàbûngi be mu evanjeeliyo wa nsòmbelu mulenga ewu lelu wa Ndaaya ewu; bateeta kwenza Yesu Kilisto

muprofeta. Mona's, Yèyè's uvwa Nzambi wa baprofeta. S'ke civwaYe cya bushuwa.

132 Yèyè ne: "Mèmè's nènkujaadikilèci anu ku Bible webe awu ne, 'Yèyè uvwa anu muntu wa patupu ewu.'"

133 Mèmè ne: "Cinjaadikilaaku."

134 Ke yèyè kwamba ne: "PaakayaYe ku majambu a Lazàrô, Bible mmwambe ne, 'Yèyè wakadila mwadi.' Ûvwa ne cya kwikala wa cifwaka cyanaana Kavwa mwa kudila mwadi to."

135 Mèmè kwamba ne: "Inábànzà, ke webe Mufundu mwine awu?" Ncyèna muswe kwikala bu udi unyangakaja cijila apa bwa kwamba eci to, kadi nènwnwàmbilè cingààkamwambilà.

136 Yèyè ne: "Ke wòwò awu."

137 Mèmè ne: "Awu mèyi's mmapeepele kupita too ne nsùpù mwenza ne mundidimbi wa nzoolo mufwe lwà nzala." Mèmè ne: "Ee, wèwè—wèwè kwèna ne kantu nansha kamwe kaudi mufwanyine kwimanyinapu to."

138 Yèyè ne: "Mona's, Yèyè's wakadila mwadi. S'ke civwa cileeja ne Yèyè uvwa wa cifwaka."

139 Mèmè ne: "Ûvwa byònsò bibidi wa cifwaka ne udi kayi mwa kufwa. Yèyè uvwa Nzambi mu mubidi."

140 Yèyè ne: "Kaa, lukutukutu naanyi we!"

141 Mèmè ne: "Wakaya ku majambu wenda udila mwadi. Aci mbulelela pa bwòbò, kadi paakananaYe mubidi Wende mukese awu..." Bible mmwambe ne: "Kakuvwa nansha cya nsongo cya kuMutangidila to; kakuyi bwimpè bwine butudi mwa kuMujingilaku to." Kadi paakasakaYe makaaya makeke awu cyanyima e kwamba ne: "Lazàrô, patuka," ne muntu ukààvwa mumane kufwa matuku anaayi ne mbole mu majambu, kupatukaye. Awu's uvwa mutambe ne muntu. Ndeajaayibi muntu udi mwa kwenza aci. Civwa ncinyi? Dibola dyakamanya Mfumwadi. Mwoyi wakamanya Mufuki wawu. Cintu kampanda civwa ne cya kwenzeka. Yèyè wakaakula ne muntu ukààvwa mufwe ne usanganyiibwa mu majambu matuku anaayi, kubiikaye cyakabidi, ne kwimanaye kuulu, ne kwikalaye ne mwoyi. Aleluuyah! Awu's uvwa n'Nzambi mu Mwan'Ende. Eyowa's, mukalenge. Awu's uvwa n'Nzambi uDileejila mu Yèyè awu, Mwànà. Awu uvwa n'Nzambi wakula, kayi muntu to.

142 Ûvwa mmuntu paakakenzakanaYe ku mucu awu dituku adi ukeba cintu kampanda cya kudya. Awu uvwa mmuntu. Kadi paakangataYe bisukwita bitaanu ne mishipa ibidi ne kudiisha bantu binunu bitaanu, aci's civwa citambe ne muntu wetu ewu. Awu uvwa n'Nzambi ubadiisha muntwamu. Ûvwa mutambe ne muprofeta, mutambe ne muntu, Ûvwa Muntu-Nzambi. Cya bushuwa.

143 Ûvwa mudyôlôle paanyima paa kaabwâtù kakese aku diloolo adi, mbû ukungula ne bwâtù butankakana bu cijiku cya mulangi mu mbû mutuucike kudi cipeepa mwamwa, pàvwà démons binunu dikumi ya pa mbû midicipe bwa kuMushipa mu mâyi diloolo adi. Yèyè uvwa muntu, ne butekete ne mucyoke ku disambidila dya babeedi, mudyôlwèle lwa paanyima apu; bya bwalu cipeepele kacyi nansha ciMutacisha to. Yèyè uvwa muntu pavwaYe mulaale apu, kadi paakabiikaYe, kuteeka dikàsà Dyende pa mwonji wa bwâtù, kujuula mèsù, ne kwamba ne: “Talalaayi, puwaayi,” ne bipeepele ne mavwala kuMutumikilabi, aci’s civwa citambe ne muntu. Awu’s uvwa n’Nzambi mu muntu, mwikale uDimanyisha. Ncya bushuwa.

144 Yèyè uvwa muntu ku nkuluse paakeelaYe lubila ulomba luse. PaakeelaYe lubila wamba ne: “Ndi ne nyoota,” awu uvwa mmuntu. PaakafwaYe, Ûvwa mmuntu, kadi mu dinda dya Paasaka paakacibulaYe citampi cya lufu, cya iferno, ne cya majambu, e kubiikaye cyakabidi, Ûvwa mutambe ne muntu: Civwa n’Nzambi mumweneshiibwe. Kabyena bikemesha to paakamba mwedi wa kasala ne:

Mu kwikala ne mwoyi, Yèyè wakannanga; mu
kufwa, Yèyè wakansungila;
Mujiikiibwe, Yèyè wakangata mpekaatu yanyi
kuya kayishiya kule;
Mu kubiika kwa ku lufu, Yèyè wakambingisha
cyanaana bwa kashidi:
Dìngà dituku Nealwe—Kaa, dituku dya
butumbi’s we!

145 Yèyè wakamba ne: “Bu mûndi Mémè ne mwoyi, nwènu peenu nudi ne mwoyi. Udi witabuuja aci anyi?” Yèyè udi umwèumwè awu makeelela, leelu, too ne kashidi. Udi witabuuja aci anyi? Mémè ndi ngitabuuja ne Nyuma Mwîmpè udi mwaba ewu mene mpindyewu. Udi witabuuja aci anyi? Mémè ndi ngitabuuja ne Yèyè neàtùjè ne Bwikadi Bwende. Udi witabuuja aci anyi? Mémè ndi ngitabuuja ne Nyuma Mwîmpè mmuswè kupongolola Bwikadi Bwende, kwondoka babeedi bônso, kwenza ne bantu bônso badi kabayi ne Nyuma Mwîmpè bujiibwe. Udi witabuuja aci anyi? Nudi nwitabuuja ne mwoyi wenu wónso anyi? Tujuukilaayi kuulu ne tuMupaayi butumbi. Mémè ndi ngitabuuja ne Yèyè neàtwìcìkìdìlè mpindyewu mene.

146 Éyi Mukalenge Nzambi, Mufuki wa maulu ne buloba, Mfukyamukeye wa Mwoyi wa Cyendeleele, Mufidi wa dipà dîmpè dyônso, twètù “Udi witabuuja aci,” Mukalenge. Tudi twitabuuja ne aci ng’Wèwè kaaba aka mu disangisha edi. Tudi twitabuuja ne aci ng’Wèwè udi ubenesha misùuka yetu. Tudi twitabuuja ne aci ng’Wèwè udi utupongolwela Nyuma Webe. Tudi twitabuuja ne Udi umwèumwè awu makeelela, leelu, too ne kashidi. Tudi twitabuuja ne Wèwè udi ne mwoyi kashidi ne kashidi ne mènà etu mmafunda mu Mukanda wa Mwoyi wa Mwànà wa mukooko.

Maulu ônsò ne buloba nebijimine, kadi twètù netwikale ne mwoyi kashidi, bwalu Wèwè udi ne mwoyi kashidi. Mukalenge, Wèwè ngwâkatùlayaci. Tudi tucii tabuuja ne mwoyi wetu wônsò. Byônsò bidi munda mwetu, tudi tubiitabuuja, Mukalenge. Mémè ndi muMunange, ndi muMunange.

¹⁴⁷ Nudi baMwitabuuje anyi? Ndi ngitabuuja ne aci ke Nyuma Mwîmpè. Kudi Cintu kampanda munkaci mwa ditwicikidila. Udi witabuuja aci anyi? Mémè ndi ngitabuuja ne mMuswe bwa kwondopa muntu yônsò mpindyewu mene. Udi witabuuja aci anyi? Elaayi byanza byenu muulu kudiYe. Imanyinaayi kuulu. Udi witabuuja aci anyi? Nyuma Mwîmpè udi mwaba ewu. Eci ke Cyôci aci! Peetelo wakamba ne: “Eci ke Cyôci aci.” Ke Yèyè awu, Nyuma Mwîmpè.

¹⁴⁸ Éyi Mukalenge, Mufuki wa maulu ne buloba, tumaaku bukole Bwebe, ne mabeneshia Ebe, ne bwîmpè Bwebe pambidi paa bantu aba, ne beneshia myoyi yabo, ne enzaku bwa bamone ne Mwânà wa muntu udi ne mwoyi kashidi ne kashidi. Enzaku nanku, Éyi Mukalenge. Nyewu tubafila kûdi Wèwè, mu Dînà dya Yesu Kilisto, Mwânà wa Nzambi.

¹⁴⁹ Muntu yônsò udi kayi ne Nyuma Mwîmpè, ela byanza byebe muulu ne tumbisha Nzambi. Ndi ngiitabuuja ne Yèyè neâkwicikidilè. Muntu kampanda amutenteketele byanza. Ke dîbà ndyôdi edi. Citudi tushaadila bindile ntanta mule ncinyi? Cikondo’s ke cyôci eci. Cikondo bwa Mpenta’s ke cyôci eci, cya dyalukila kudi Nzambi. Dilongololaayi kumpala kwa Nzambi, Mpenta! Enza bwa mwoyi webe wikale munyukushiibwe kudi bukole bwa Nzambi udi ne mwoyi. Nyuma Wende alwe abwele munda mwenu amu, apacishe misùuka yenu patapata. N’Yèyè ewu mwaba ewu diloolo ne diloolo dyônsò, mwaba ewu bwa kwondopa babeedi, kutabeeja bampofu, mu bukole bunene ne bwa katootwela kudiYe ujaadikila ne Yèyè mwine udi umwèumwè awu kashidi ne kashidi. Aleluuyah’s we!

¹⁵⁰ Mutumbishaayi. Elaayi byanza byenu muulu. Pwayi mwoyi mwaba unudi awu; numanye anu ne nudi pabwîpî Nende, ne bwîmpè Bwende, ne butumbi Bwende, ne bukole Bwende, ne luse Lwende bidi bishâalakù bwa kashidi. Yèyè udi umwèumwè awu bwa kashidi. Dînà dya Mukalenge dibeneshiibwe. Aleluuyah! Kaa, Dînà Dyende dya Cijila ditumbishiibwe.

¹⁵¹ Kaa, mushindu mwine udiYe mulenga, udiYe wa bukole’s we. Mbanganyi badi baswe kulambula nsômbelu yabo kudi Nzambi mpindyewu mene, cyakabidi? Ela cyanza cyebe muulu. Mbanganyi badi baswe kulambula nsômbelu yabo kudi Nzambi? Ke cyôci aci. Elaayi byanza byenu muulu. Twânji tumonaayibi Mpenta tûng. Twânji tumonaayibi cisamba cya Nzambi tûng. Mémè nêngèlè cyanyi cyanza muulu. “Mukalenge, ke mémè ewu. Ntumaaku.” Nanku angataaku Mwanjelo ne makâlâ a pa cyoshelu utume bukole Bwebe pambidi peetu, Mukalenge.

Nzambi wa yaaya, cyènzààku mu kaabujima kaa Nyuma Webe, Éyì Taatu. Teelejaaku disambila dyetu, Éyì Mukalenge. Teelejaaku disambila dyetu, twêtù bu bânà badi biitabuuja biimanyine kuulu. Butumbi bwikale kudi Dînà Dyende.

¹⁵² Kaa, anu bu mavwala a butumbi munkaci mwa kumata, kaa, mamata a lumuma lwa luse. Éyì, butumbi bwikale kudi Nzambi's we. Swaku bwa misùuka yetu yindile. Udi witabuuja aci anyi? Udi witabuuja aci anyi? Eci ke Nyuma Mwîmpè udi ulwa. Ebu ke bukole budi kabuyi bumweneka budi butubweja mu Bukalenge bwa Nzambi abu, mabenesha a Mpenta. Alukilaayi kumbelu. Mbanwîndile bwa nwênù kwalukila kumbelu. Nudi bantu baa mushinga mukole. Nzambi mmuswe bwa nwênù kudilambula. Nwênù bakaji, dikezulaayi. Nwênù balume, dikezulaayi. Tubangaayi kwalukila kudi Nzambi ne tukwacile Nzambi mudimu ne mwoyi mukezuke wa menemene.

¹⁵³ Tumbishaayi Nzambi, Nyuma Mwîmpè nyewu mupatuke mwikale mu disangisha emu. Enza anu cyûdì peebe udyumvwa musakiibwe bwa kwenza aci. Lekela anu Nyuma Mwîmpè akwate mudimu pambidi peebe. Kakwena cîndì mêmè mwa kwamba nansha cimwe to. Ncyêna anu mumanye cya dyamba patudi twakulangana apa to. Nyuma Mwîmpè nyewu anu myaba yônso naka mu citanda emu. Dînà dya Mukalenge dibeneshiibwe. Butumbi bwikale kudi Mukalenge. Kaa, aleluuyah! Aleluuyah! Butumbi bwikale kudi Mukalenge. Mukalenge atumbishiibwe. Mushindu mwine udibi bilenga, udibi bya butumbi's we. . . Mushindu mwine udi ditumbisha dya bansantu baa Nzambi dilenga, mushindu udidi dya dikemesha pa mpala yenu, pa Bwikadi bwa Nyuma Mwîmpè mu mwaba ewu bunyunguluka ne butuleeja butumbi Bwende mu musumba munene udi ne dîyì dimwe ewu, batumbisha Dînà Dyende.

¹⁵⁴ Kudimuka anu cyanaana ku luseke lwebe ulabulangane ku cyanza ne muntu kampanda, wamba ne: "Mukalenge atumbe, mwaneetu wa balume. Mukalenge atumbe, mwaneetu wa bakaji." Tubwelaayi anumu naka ne tulekelaayi Nzambi atusangulujeku. Mukalenge atumbe. Ncyà bushuwa. Nwênù bônso ba-Méthodistes, ne ba-Baptistes, ne ba-Presbytériens, beena Mpenta, ne ba-Adventistes baa Dituku dya Mwandamutekete, ne cyônso cinudi aci, labulanganaayi ku cyanza mu Bwikadi bwa Mukalenge Nzambi. Ke cyôci aci. Kaa, aleluuyah! Aleluuyah! Aleluuyah! Kaa, ndi ne disanka dîngi bwa pândi umwe wabo. Ndi ne disanka dîngi. Kaa, biikale tuupula bimanu, biikale twimansha bisota pambelu. Butumbi's we! Budishikaminyi mu Mukalenge, biikale nutumbisha Dînà Dyende dya cijila. . . Dînà dya Mukalenge dibeneshiibwe. Kaa, aleluuyah! Nzambi atumbe.

¹⁵⁵ Kaa, ntu mêmè munange anu kumona aci's: bantu biikale balabulangana ku cyanza ne bafukishilangana mimwemwe kwîsù. Bukole bwa Nzambi bwikale bwamba ne: "Ke cyôci

aci. Ke cyôci aci, tudi bânà baa Nzambi. Twêtù bônso tudi ekeleeziya munene umwepele, muntu munene umwepele mu Kilisto Yesu, Mukaji musela Wende, Wa butumbi awu.” Dilwa dya Mukalenge dyaseemenyi. Bantu Bende munkaci mwa kudisanga ne banangangane . . . ne dinanga ne bukole bya Bwikadi Bwende. Kaa, eci’s ncyenze anu bu Dyulu’s. Kaa, eci’s ncîmpè. Amen. Kaa, mushindu mwine udibi bya butumbi, udibi bilenga bilaya’s we: biikale anu bakuukwila Mukalenge mu Nyuma ne mu bukole. Cikondo cya dikema. (Aci civwa ne cya kwimana; tudi tubanga.)

156 Kakwena anu . . . Mvwa mwambile bânà beetu ne: “Bânà beetu, kakwena paa kwimanyikila to.” Kakwena mwaba apa ùdi . . . Katwenaku tubanga to, pa nanku katwena twimanyika to. Anu—anu bilenga bilaya . . . Mbanganyi badi badyūmwè bîmpè menemene? Anu Bwikadi bwa Mukalenge pa bwôbò, kaa, ekelekele, mbilenga bya kacya, Bwikadi bwa Mukalenge mwaba ewu.

157 Mpindyewu, Bwikadi bwa Mukalenge budi kaaba aka bwa kwondopa babeeedi, kusangaja bantu. Mwitabuujaayi anu naka. Nudi baMwitabuuje anyi? Twêtù mwa kuMwitabuuja, bintu byônsò bidi mwa kwenzeka. Nudi nwitabuuja nanku anyi? Nudi nwitabuuja ne aci m’Bwikadi bwa Mukalenge anyi?


158 Mpindyewu, panucidi . . . Mpeeshaayiku anu katupa kakese kaa dîbà, anu katupa kakese kaa dîbà cyanaana mpindyewu, ne nuteelejeku anu bwa katanci kakese cyanaana. Lekelaayi nnujaadikileku ne eci n’Nyuma Mwîmpè kaaba aka. Lekelaayi nnuleejeku ne Nyuma Mwîmpè, Yêyè mene udi wakula awu, Yêyè udi wenza cyôci cintu aci awu, mmucimanye. Mbanganyi badi kaaba aka mpindyewu, badi babwele kaaba aka biikale basaama. Tumonaayibi byanza byenu. Aba bàvwà ne disaama kampanda . . . Kudi bantu . . .

159 Kudi muntu mwimane mwaba wawa. Udi witabuuja anyi, mukalenge? Kî mbaabanye twarta twa disambila to, kadi udi witabuuja ne Nzambi udi mwa kukwondopa anyi? Udi witabuuja ne Yêyè udi mwa kungambila lutatu lwebe anyi? Ludi mu lubadi lwebe amu. Udi mwindile bwa kukupandabo. Ncyà bushuwa. Dînà dyebe m’Mukalenge Cartwright. Ncyà bushuwa. Ncyà bushuwa anyi? Nyungisha cyanza cyebe. Eyo. Alukilaaku kwebe ūmwè bîmpè, kabyakukengela bwa kukupandabo to. Udi uciitabuuja anyi?

160 Muntu mulume udi mwambule mwânà mukese mu maboko ende wawa, udi witabuuja ne mêmè ndi musadidi wa Nzambi anyi? Udi witabuuja ne eci n’Nyuma Mwîmpè anyi? Mêmè ncyêna mukumanye to, mmwômò anyi? Kacya bandela ncitu mwanji kukumonaku to; katwena bamanyangane to. Udi witabuuja ne Nyuma Mwîmpè udi mwa kungambila lutatu ludi naalu mwânà awu anyi? Udi ne cikupi. Ncyà bushuwa. Kî ncyà

bushuwa anyi? Cya bushuwa. Wêwè kutu wa muneemu to. To. Wêwè udi ne disaama dya cifu, ke dyûdi usaama, wêwè mwine. Neya bushuwa, kî mmwômò anyi? Udi wa ku Kansas City. Eyo. Alukilaaku, Yesu Kilisto udi ukusangaja. Aleluuyah! Itabuuja. Udi uciitabuuja ne mwoyi webe wônsò anyi?

¹⁶¹ S'ke Mwanjelo wa Mukalenge nyewu, mulembelele mu lupeepele kumutu kwa mukaji mukese—mukese menemene, wa mushindame wa musangeelu, udi musòmbè anu kaaba aka ewu, ùsaama kaamunda. Udi witabuuja ne Nzambi neakwondope kaamunda aku anyi, mwaneetu wa bakaji? Wêwè, udi ne kaacilòngò kakese kakunze ku cifulu cyebe ewu, ela cyaanza cyebe muulu. Eyo. Alukila mwebe nenku usangale. Amen. Kaa, s'n'Nzambi's; s'n'Kilisto Mwânà wa Nzambi. Yêyè mmubiike ku bafwe. Ùdi kaaba aka.

¹⁶² Mpindyewu, tentekelanganaayi byanza muntu ne muntu ne enzaayi anu mukùngùlù mwîmpè wa disambila, muntu ne muntu wa kunudi, pândi ndomba muntu kampanda bwa kulwaye mwaba ewu apa. Lwâku mwaba ewu, mwaneetu wa balume. Panucidi batentekelangane byanza bwa kuleeja ne Nzambi ucitu anu wondopa apu, ndi ndomba mwaneetu wa balume ewu bwa yêyè pende asambile. (Tuyaaku tûng. Eyo.) Butumbi bwikale kudi Mukalenge Nzambi's we. 

UDI WITABUUJA ACI ANYI? LUA60-0402

(Believest Thou This?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo, matuku 2 a ngondo mwinâyi, cidimu cya 1960, mu Municipal Auditorium mu Tulsa, Oklahoma, U.S.A. Ndyumusha pa mukaba wa mêyi ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org